

316.641.74  
Б 63.

С. ПСИХОЛОГИЯ. ТАДБИРКОРЛИК

Фрэнк  
БЕТТЖЕР

Янги китоб

# Муваффакият СИРЛАРИ

Уибү китоб  
муаллифи ўз жонига  
қасд қилмоқчи бўлган.  
Бу ҳол рўй бермади ва  
у ҳаётда катта  
муваффакият  
қозонди



Янги фаровон ҳаётга пойдевор қўйишни истайсизми?

Унда бу китоб сиз учун!

~~316.641.744~~

~~263~~

Янги китоб

Бизнес • Психология • Тадбиркорлик

Фрэнк БЕТТЖЕР

# Муваффақият СИРЛАРИ

Машақатлар орқали юлдузлар сари

Ушбу китоб муаллифи ўз жонига қасд қилмоқчи бўлган эди.  
Бу ҳол рўй бермади ва у ҳаётда катта муваффақият қозонди

Янги фаровон ҳаётга пойдевор қўйишни истайсизми?  
Унда бу китоб сиз учун!



«YANGI KITOB»  
TOSHKENT  
2020



УЎК: 316.64:174.4

КБК: 88.52

Б 63

**Б 63 Беттжер, Фрэнк**

Муваффакият сирлари [Матн] / Ф. Беттжер. – Тошкент: Yangi kitob, 2020. – 176 б.

ISBN 978-9943-5768-5-8

УЎК: 316.64:174.4

КБК: 88.52

Қўлингиздаги китоб бутун дунёни кезиб чиқкан. Унинг муаллифи нойорликдан муваффакият сари йўлни қандаи босиб ўтганини ғоят таъсирли тарзда ҳикоя қиласади. Бу одам ўз вақтида ишсиз қолган, умидсизликка тушган, азиат чеккан, ҳатто ўз жонига қасд қилишга уринган. Хўш, у чорасизлик, йўқчилик комидан қай тарзда чиқиб кетди? Қайси тамоиллар омадга эришишига омил бўлди?

Китобда муаллифнинг қисқа вақт ичida муваффакият қозонгани турли-туман воқеалар мисолида очиб берилади. Шу аснода ҳар қандай киши худди шу тарзда омад чўққисига чиқиши мумкинлиги уқтирилади.

Кенг китобхонлар оммасига мўлжалланган.

Таржимон:  
Фатҳулла Намозов

Тақризчилар:

Норкул Бекмирзаев,  
Ўзбекистон Ёзувчилар ўюшмаси аъзоси,  
Халқаро антик дунё илмий академияси  
академиги ва совриндори,

Абдуқаюм Йўлдошев,  
Ўзбекистон ёзувчилар ўюшмаси аъзоси.

ISBN 978-9943-5768-5-8



© Ф.Беттжер.  
«Муваффакият сирлари»  
Таржимон: Ф.Намозов.  
© «Yangi kitob» МЧЖ, 2020.

**КИТОБ ТҮГРИСИДА** негиздиган сенгу

## КИТОБ ТҮФРИСИДА

Мен мазкур китобни бутун умри мобайнида бошқаларга ёрдам бериб келган инсон – Дейл Карнегига бағишлайман.

У менга энг оғир кунимда мадад қўлини чўзган. Ўшанда каминанинг ҳаёти – йигирма тўқиз ёшли омади юришмаган собиқ бейсболчи, ҳеч қаердан иш топа олмаган йигитчанинг умри интиҳо топгандай кўринганди. Мен бутунлай умидсизликка тушиб қолгандим. Айни шу пайтда Филадельфияда нотиқлик санъати маҳорати бўйича курсларни бошқарган Дейл Карнеги мени Бенжамин Франклиннинг сирлари билан таништирди. Билиб олганларим ҳаётимни бутунлай ўзгартириб юборди: мен ўзим орзу ҳам қилмаган муваффақиятга эришдим!

Орадан ўн иккى йил ўтгач, ишдан четлашмоқчи бўлганимда, Дейл мендан АҚШ шарқидаги йирик шаҳарлар – Бостондан Вашингтонгacha тузилган курсларни олиб бориша ёрдам беришимни илтимос қилди. Бир неча йилдан сўнг эса маъruzавий давраларига қўшилишимга ишонтириди. Биз икки йил давомида раҳбар ходимларга ўзаро мулоқот ҳамда савдо-сотиқ қилиш маданиятини ўргатиш буйича бир ҳафталик семинар машғулотлари мажмуини биргаликда олиб бордик.

Ёдимда, Оклахома штатидаги Талса шаҳрида бўлганимда Дейл мени китоб ёзишга ундағанди.

— Дейл, — дедим унга, — сиз мени фақат бошланғич мактабнинг олтинчли синфигача ўқиганимдан яхши хабардорсиз. Мен китоб ёза олмайман.

— Күлоқ солинг, Фрэнк, — жавоб берди Дейл, — сиз Бенжамин Франклиннинг 13-ҳафталик муваффақият усулини ўрганиб, бошқалар колледжа тўрт йил ўқиганидан ҳам кўпроқ билиб олдингиз. Шундай экан, Франклин ғояларини

ўзида синааб кўрган кишининг янгича услубда ёзган китобини биринчи бўлиб сиз нашр қиласиз. Сизнинг ҳаётингиз шу даражада ҳайратланарлики, Фрэнк, бу ҳақдаги китоб билан эндиғина иш фаолиятини бошлаган ўсмирлар ва қизларга ёрдам берасиз. Китоб уларни «жаннатда учинчи базада ўйнаганингиз»дан<sup>1</sup> кейин ҳам узоқ вақт илҳомлантириб туради.

Менда ёзувчилик бўйича ҳеч қандай тажриба йўқ. Шу боис, Дейл иш бошлаш учун машқ тариқасида «Кечаги омадсиз – бугун муваффақият қозонган савдогар» номли китоб ёзишни маслаҳат берди. Яъни, «қандай қилиб омадсизликдан савдо-сотиқда муваффақиятга эришганим» хусусида қалам тебратишим керак эди. Мен унинг барча ўгитларига амал қилдим. Аслида иккита китоб ёздим.

Энди эса Дейлнинг ўзини ҳам жаннат ўз бағрига олди. Борди-ю, у ўша ерда бўлмаса, демак, кимгadir ёрдам бериш учун йўлда тўхтаб қолган. Дейл Франклин фалсафасига ишонарди. Унинг: «Худога энг хуш келадиган машғулот – одамларга яхшилик қилишдир», – деган сўзларини такрорлашни ёқтиради.

Мен Дейл Карнеги ҳамда Бен Франклин суратлари турган столга мук тушиб ёзаман, улар мени руҳлантириб туради. Мазкур китобни Филадельфиянинг қашшоқ ҳудудларидан биридаги мўъжаз кўчада ўтган ёшлигимдан бошлайман. Назаримда, ўша пайтларда икки бор қарғишга учраган эдим...

Мана у. Умид қиламанки, сизларга ёқади.

Ф.Б.

<sup>1</sup> «Вафот этгандан сўнг» маъносида.

## Биринчи қисм

## **«СИЗНИ ПРЕЗИДЕНТ КҮРМОҚЧИ»**

## КИТОБХОНГА

Ўйин умидни узса ҳам бўладиган даражада бой берилгандек туюлганда бейсбол бўйича таникли тренер қария Билл Кларк одатда тренерлик ўриндиғидан туриб, бизни қуидаги сўзлар билан руҳлантиради:

— Энг кутилмаган воқеа айнан ана шундай ноилож вазиятларда рўй беради.

Унинг сўзларида ҳақиқат учқунлари бор эди, албатта. Чунки бу бизга таъсир қилар, нимадир рўй бераётгандай қўринар ва баъзан ана шу «нимадир» содир ҳам бўларди!

Мен мазкур китобнинг дастлабки қисмидаги илк тўқизта бўлимни биринчи «иннинг»<sup>2</sup> деб олганман. «Энг кутилмаган воқеа ана шунда рўй беради». Ҳар бир «иннинг»да барчасига нуқта қўйиш фикри туғиларди. Шунда мўйсафид Биллнинг бошқа сўзлари эсимга келарди:

— Айнан ҳаммаси бехуда бўлаётгандай қўринганида, асло ташлаб қўймаслик керак...

Фақат орадан бир неча йиллар ўтгач, тушундимки, ана ўша тўқизта машаққатдан иборат «иннинг»лар менинг янги фаровон ҳаётимга пойdevор бўлиб хизмат қилган экан! Аслида ушбу китобнинг биринчи қисми ёзилмаганида, иккинчиси ҳеч қачон дунёга келмаган бўларди: бу икки қисм бир-бирига боғлиқ. Шундай қилиб, мен ўзимнинг таассуротларимни фантастик бейсбол матчидан бошламоқ чиман.

<sup>2</sup> Иннинг – бейсболда ҳар бир жамоа бир марта ҳужумда ва бир мартадан химояда ўйнайдиган пайт. Бутун ўйин 9 иннингдан иборат.

## Бириңчи бўлим

### ЭНГ ФАНТАСТИК БЕЙСБОЛ МАТЧИ

Мен бейсбол<sup>3</sup> бўйича профессионал ўйинчи сифатида Канаданинг Монреалидан Техасдаги Галвестонга қадар деярли ҳар бир лига (бирлашма)да ўйнаганман. Бу фантастик ўйин эса Делавэр округи лигаси доирасида Пенсильвания штатидаги Клифтон-Хайтс шаҳарчасида бўлиб ўтганди.

Мазкур лигага тўртта шаҳар: Честер, Апленд, Клифтон-Хайтс ва Медия кирарди. Ўшанда мен «Медия»нинг учинчи базасида ўйнардим.

Тўртта жамоа ўртасидаги беллашув, бейсболда шахсан шоҳид бўлганимдек, бинойидек ўтаётганди. Мавсум ниҳояланиб қолганида, «Медия» ва «Клифтон-Хайтс» бириңчи ўринни бўлишиб олди. Улар чемпионни аниқлаш учун финалда ўйнашлари керак эди. Тўқизинчи иннингда икки аутдан сўнг биз 4:3 ҳисобида олдинга ўтиб олдик. «Клифтон»да учинчи база учун қўшимча равишда масофани айланиб чиқиш бор эди. Аммо навбатдаги бита билан уриб қайтарилган тўпни аутга жўнатсак, ўйин ниҳоясига етар ва биз чемпион бўлардик.

Бита билан уриб қайтарган хужумчи<sup>4</sup>, жуда яхши чопувчи йигит учинчи ва яқин база ўртасига пастлатиб қаттиқ зарба берди. Мен учинчи базада ўйнаётгандим ва тўпни бемалол тутиб олардим, аммо ундан тезроқ кутулиш учун бириңчи база яқинига ташладим. Бириңчи бейсменимиз<sup>5</sup> «бургут» Огден база чизигига яқин жойда тўпни тутиш учун

<sup>3</sup> Бейсбол (инглизча Baseball, base – «база», ball – «тўп») бита ва бейсбол тўпу билан жамоа бўлиб ўйналадиган спорт тури. Ўйндан мақсад рақиб жамоа ўйинчиси (питчер) улоқтирган коптоқни бита билан уриб қайтариш ва коптоқ рақиб жамоа кўлига тушгунча 4 та базага тегиб, 90 фут (1 фут – 27,4 метр) масофани айланиб чиқишидир.

<sup>4</sup> Бэттер (инглизча, batter) – тўпни бита билан уриб қайтарадиган хужумчи. «Ўй»даги кетчер қаршисида (чап ёки ўнг томонида) туради.

<sup>5</sup> Бейсмен – бейсбол ўйинчиси, базада ҳаракат қиласи (майдоннинг тўрт нуқтасидан бири. Югурувчи очкони кўлга киритиш учун кетма-кетлиқда унга кўлини теккизиши керак).

қўлини чўзганда, чопиб келаётган ҳужумчи унга боши билан урилди ва иккаласи ҳам йиқилди! Огден бошини кўтарганида, қизиқ ҳодисани кўриб қолди: тўп баландликдан сакраб томошабинлар ўтирадиган табиий «трибуна»га тушди. Ўт устида ҳаяжонланиб, аччиқланиб ўтирган юзлаб «Клифтон-Хайтс» ишқибозлари бор эди. Тўп бир қизнинг юбкаси тагига кириб кетди.

Биринчи бейсменимиз баландликка югуриб чиқиб кетди. Уларнинг ўйинчиси ҳам база ёқалаб олға ташланди. Бу вақтда учинчи базадаги бошқа ҳужумчи қўшимча равишда масофани айланиб чиқсан эди.

Биз «Клифтон-Хайтс»га қарши қўйидаги тактикани асос қилиб олгандик: қандай бўлмасин, ҳужумга «қайнаб» ташланиш керак. Аммо ҳеч қайсимиз бунчалик кўп ишқибозлар тўдасини кутмагандик. Қизгача етиб борган Огден: «Ўрнингдан тур!» – деб қичқирди, аммо ширингина «Клифтон» мухлисаси унга фақат бир қиё боқди, холос.

Огден тезгина ортига қаради. Шунда айланиб чопаётган ўйинчи иккинчи базадан ўтиб, учинчисига ҳам худди ақлдан озган каби ташланганига кўзи тушди. «Тур!» – деб яна қичқирди у қизга. Аммо мухлиса, ҳатто қимирлаб ҳам қўйишини эп билмади.

Огден яна чопиб бораётган ўйинчига зимдан назар ташлаб, худди ғолиблар каби учинчи базани ҳам ақл бовар қилмайдиган тезлиқда эгаллаганини кўрди. Бирор сонияни ҳам йўқотмаслик керак эди. У қизнинг қўлтиғидан ушлаб, «шап» этказганча турғазди ва ғазабга миниб силкитди. Копток тушди. Огден тўпни яшин тезлигида олди-ю, тўғридан-тўғри қабул қиласиган ўйинчимизнинг қўлига отди. У эса сира иккиланмай, чопиб келаётган ўйинчидан анча нарига кетиб қолди.

– Аутга! – ўкириб юборди ҳакам.

Бунга жавобан чопиб келаётган ўйинчи ердан сакраб, ўнг ва чап қўллари билан бечора ҳакамнинг жағига шундай солиб юборди, у ҳатто юқорига сапчиди. Ҳакам йиқилди, устига чопиб келаётган ўйинчи ағдарилиб тушди! Лахза ўтмай, бутун майдонда энг даҳшатли муштлашув бошланиб

кетди! Бир тұда полициячилар бунинг олдида күчсиз здилар. Беш кишини, шу жумладан, ҳакамни ҳам Делавэр округи шифохонасига, олти кишини эса округ турмасига жұнатышды.

Бу үйин менга аёлларнинг шахс сиғатидаги ақамиятими камситиши мүмкін эмаслигини ўргатды. Делавэр округининг таниқли адвокати ва лига президенти Бортон Уикс үша оқшомнинг үзідаёқ қарор чиқарди. У келгуси шанбада мусобақаны қайта ўтказишга ахд қылғанди.

Ездининг охирлари бўлиб, ов мавсуми аллақачон бошланғанди. Бу ҳақда нега гапирияпсан, деб сўрашингиз мүмкін... Гап шундаки, кейин шундай воқеа рўй бериб... Яхшиси, ҳаммасини бир бошдан айтиб берай.

Дунёning бирор-бир чемпионлик матчи бу такрорий үйин сингари тушкун кайфиятда ўтмаган. Ҳар иккала жамоанинг тўп узатувчилари ва барча үйинчилари үйинга шунчалик киришиб кетдиларки, гўё уларнинг бутун ҳаёти ана шу учрашув натижасига боғлиқ бўлиб қолгандай эди! Үйин майдонини ўрмонга қадар арқон билан маҳкам ўраб олишди. Назаримда, Делавэр округининг бутун аҳолиси, жумладан, полициячилар ҳам шу үйинни кўриш учун келишганди. Оломон иккига бўлинди: «Медия» ишқибозлари майдоннинг бир томонини, клифтонликлар эса қарама-қарши тарафни эгалладилар. Ҳамма жойда тотализатор<sup>6</sup> ишляпти, деган овозалар тарқалди. Бу үйинни кўриш учун Филадельфиядан юзлаб шаҳарликлар келишди. Сизни ишонтириб айтаманки, улар асло зерикишмади!

Ғалати равища мос келишини қарангки, үйин тўққизинчи иннингга борганида, иккى аутда ҳисоб худди ўтган ҳафтадаги каби «Медия» фойдасига бўлди – 4:3. Лекин битта асосий фарқ ҳам бор эди. «Клифтон»да базалар тўла бўлиб, жамоанинг тўп урадиган энг яхши үйинчиси ажойиб үйин кўрсатди. У лигадаги энг хафли хиттер<sup>7</sup> ҳисобланарди. Бу үйинчи майдон ўртасига йўл олиб, коптокни узатмоқчи бўлганида, қарашлари қотилникига ўхшарди.

<sup>6</sup> Пул тикиб үйнашни уюштирадиган бюронинг пул тикканларни кўрсатадиган ҳисоблагичи.

<sup>7</sup> Хиттер (инглизча hitter) – тўп урадиган спортчи.

Оломон жазавага тушганди.

– Түпни биринчи узатилган заҳоти ўрмонга уриб кири-  
tingлар! – деб ёлворишарди «Клифтон» мухлислари.

Битта яхши зарба икки марта масофани айланиб чиқиши-  
ни таъминлаб, «Клифтон-Хайтс»га чемпионлик унвонини  
олиб бериш мумкин эди! Түп узатувчимиз Вернон Тачсто-  
ун қулочкашлаб коптокни шундай зарб билан улоқтирдики,  
уни ишқибозлардан ҳеч ким кўра олмай қолди. Ҳамманинг  
нафаси ичига тушиб кетди. Аммо түп қайтарувчи дарҳол  
ўзини ўнглаб, куттиришга мажбур қилмади. У худди аме-  
рикалик машҳур бейсболчи Бейб Рут<sup>8</sup> каби куч билан кўл  
силтади ва... коптокни урди. Бироқ клифтонликлар умид-  
сиз ҳолда «уф» тортиб юбориши. Түп «Клифтон-Хайтс»  
ишқибозларини даҳшатта солғанча нақ уй олдида ҳавога  
тик кўтарилид. Барча ўйинчилар база олдида уймаланиб  
қолиши. Илгари олий лигада ўйнаган копток қабул қилув-  
чимиз қартайган Жо Ноттснинг түпни ушлаб олиши ва биз  
чемпионликни кўлга киритишимиз учун мингдан бир имко-  
ният қолганди.

Жуда қаттиқ қий-чув пайтида қизил рангли овчилар шап-  
касини кийган, қўлида милтиқ тутган икки овчининг ўрмон-  
дан чиқиб арқон-тўсиқ ёнига келганини ҳеч ким пайқамай  
қолди. Улардан бири клифтонлик бўлиб, айтишларича,  
«Клифтон» енгишини айтиб йирик пулга гаров боғлаган. У  
бир қараашда вазиятни баҳолаб, милтиқни ростлади. Жами  
тирик жон диққатини тўпга қаратганди. Копток ўйинчимиз-  
нинг бошидан тахминан йигирма фут баландда эди. Бир-  
дан ўқ узилди. Барчанинг кўз олдида түп ҳавода сакраб  
кетди ва... ғойиб бўлди.

Бир ҳафта бурун мен кўп нарсани кўриб қўйдим, деб  
ўйлагандим, аммо ўша муштлашув «прелюдия»<sup>9</sup> эди, хо-  
лос. Бугун эса ҳақиқий «фуга»<sup>10</sup> янграрди! Овчининг ўқ  
узиши гўё ҳаммани муштлашувга чорлагандай бўлди.

---

<sup>8</sup> Бейб Рут – американский бейсболист Георг Херман Рутнинг лақаби.

<sup>9</sup> Прелюдия – кичикроқ мусиқий асар.

<sup>10</sup> Фуга – бир мусиқавий мавзунинг бир неча овозда изчил тақорланиши;  
шу усулда тақорлашга асосланган мусиқий асар.

Ҳар иккала жамоанинг барча ўйинчилари ва эс-хушидан ажралган юзлаб ишқибозлар токи полиция ва ўт ўчирувчилар жанжалга нуқта қўймагунича майдонни тўлдириб юборишиди. Муштлашишдан қочиш йўли йўқ эди. Айrim «бақувват»лар алоҳида тизимда фаолият кўрсатишарди. Улар уч кишилашиб ишлашиди: иккитаси жабрдийдан ушлаб оларди ва қўлини орқасига қайираради, учинчиси эса муштлашишда қўлланадиган металл асбоб билан бечоранинг у ер-бу ерини «силаб-сийпалаб», жагига туширади.

Полиция жамоат тартибини тинчитгунича, ўт ўчирувчилар ёнғинга қарши ишлатиладиган сув насоси орқали тўполончиларни ҳовуридан тушириб қўйишиди. Бу сафар Делавэр округи шифохонаси, шу билан бирга, «Фитцжеральд Мерси» госпитали ва, албатта, округ қамоқхонаси ҳам яхшигина хизмат кўрсатди.

Икки ўйин оқибатларини таҳлил қилган бир спортчи шундай деб ёзганди: «Шак-шубҳасиз, бу бейсбол тарихидаги энг фантастик ўйинлар эди! Рўй берган муштлашув эса Ватерлоо ёнидаги жангдан буён мислсиз саналади!»

## Иккинчи бўлим

### МЕНИНГ ПРОФЕССИОНАЛ БЕЙСБОЛ БИЛАН МАШФУЛ БЎЛГАНИМ ҚАНДАЙ РЎЙ БЕРГАНИ ҲАҚИДА

Мен эшигим олдида турган икки нусхага кўзим тушган заҳоти уларнинг кимлигини дарров фаҳмладим. Бу танбал чўрткесарларни Риж-авеню муюлишида, кўпинча «Макданиэлс» салуни<sup>11</sup> ёнида тез-тез кўриш мумкин эди. Мен эндигина ишдан келган ва ҳали кийинишга ҳам улгурмагандим (ўшанда чилангар-сантехник ёрдамчиси бўлиб ишлардим). Шундай қилиб, ирkit, мойга ботган коржомада эшикни очдим.

<sup>11</sup> Салун (инглизча, saloon) – Американинг ғарбий қисмида мавжуд бўлган анъянавий барларнинг номи.

– Фрэнк Беттжер сенмисан? – деб сўради улардан бири.  
– Ҳа, – жавоб бердим мен сергак тортиб.

– Биз келгуси шанбада сенинг «Макданиэлс» салуни учун «Донахью» салунига қарши эркин ўйинчи бўлиб ўйнашингни истаймиз, – деди уларнинг каттароги. – Биз «Шутцен» паркида ўйнаймиз.

Бу гапдан ҳайрон бўлиб қолдим ва савол билан жавоб бердим:

– Нега энди «Макданиэлс» салуни учун ўйнар эканман?  
Мен ахир у ерда ҳеч қанчон бўлмаганман.

– Хўш, нима бўпти? Бунга ким ҳам эътибор берарди? – ишонтиришга уринди иккаласи.

– Сизлар нега айнан менинг олдимга келдиларинг?

– «Туллак» Шарп ва «Ичак» Маккарти бизга сен ҳақингда гапириб беришганди. Улар сени ўтган кузда Клифтон-Хайтсдаги муштлашув бўлган ўйинда кўришган экан. «Туллак» ҳам, «Ичак» ҳам биз учун ўйнашади. Сенга беш бакс тўлаймиз!

Шу пайтга қадар ўйинда менга энг кўпи билан икки доллар тўлашганди. Беш бакс унча ёмон бўлмаган маблағдай кўринди. Аммо улар тилга олган икки йигитни танирдим. Улар «паркда учеб юрадиган чумчук»лардан бўлиб, хиёбонда сандироқлашар, профессионал ўйинчиларни гийбат қилиб, яшаш учун ишлашни хохламайдиган кишилар эди. Мен улар билан бир мартагина «Фермонт» боғида ўйнагандим. Агар «Туллак» Шарп ичишни ошириб юбормаса, яхшигина ўйинчилик иқтидори бор.

«Шутцен» паркида бўлиб ўтган ўйинлар тўғрисида кўп эшитгандим. У ерда жалб этадиган энг асосий жиҳат – ўйинчилар ўринидигига қўйиладиган муздай пиволи бочкалар эди. Қанча иссанг, барчаси бепул. Бунинг устига аксарият ўйинчилар белида сувдон осиб юришарди. Бешинчи иннингга бориб, уларнинг бари гандироқлаб қоларди.

Йўқ, деб ўйладим мен, бундай тентаклар билан ўйнай олмайман. Онамга қолса, беш доллар ҳам кифоя қиласи.

ди-ю, аммо у бунга ҳеч қачон рози бўлмасди. Волидам пиёнисталарга асло тоқат қила олмасди. Виски хонадонимизни абгор ҳолга келтирган. Отам ароқхўрлик туфайли онамни бир чақасиз, беш бола ва бир олам қарз билан қолдириб, ўлиб кетганди. Ундан мерос – тўрт хонали мўъжаз уй. Онам узоқ йиллар мобайнида кундалик ишидан ташқари бизни кийинтириш, едириш ва мактабга юбориш учун кир ювиш, бичиш-тикиш билан ҳам машғул бўлишига тўғри келганди.

Тахминан ўша пайтларда Керри Нейшн<sup>12</sup> – «Канзас циклони» майхоналарни болта билан майдалар экан, ҳеч нимадан тап тортмасди. Онам ўшанда Керрининг ажойиб издошига айланган бўларди.

Ва мана, мен бу икки такасалтантигга баҳона қидириб то-пиш билан овора эканман, шанба куни ишим кўп дейиши ни ўйладим. Аммо каттаси шартта гапимни бўлди-ю, нега бирдан қароримни ўзгартирганим ҳақида сўради. У менга айтган гапларидан сўнг ўйнашга рухсат беришлари учун ўзларига пул тўлашга тайёр эдим.

– Қулоқ сол, йигитча, – деди у, – сенда олий лигадаги тўп оширувчи «ҳиндур»нинг айнан ўзгинаси – Донахьюга қарши ўйнаш имконияти бўлади.

Менга шу гапнинг ўзи кифоя эди!

Ўша шанбани ҳеч қачон унутмайман, чунки у менинг чи-лангар-сантехник ёрдамчиси сифатида ишимга нуқта қўйганди.

«Мақданиэлс» «ҳиндур» Донахью жамоаси дарвозасига бор-йўғи олти марта ҳужум қилди, холос. Аммо омад биз томонда эди. 6:4 ҳисоби билан ғалаба қозондик. Мен узатган тўпларнинг 6 тасидан 4 таси жамоага омад олиб келди. Иккита очкони эса ўзим қўлга киритдим.

Мени қойил қолдиргани шуки, ҳар иккала жамоа ҳам ўйинга жиддий киришди. Ўша куни ҳеч ким ичмади – барча мардонавор туриб, охиригача курашди.

<sup>12</sup> Керри Амелия Нейшн (1846 – 1911) – XIX аср охири – XX аср бошларида АҚШ хушёр турмуш тарзи жорий этиш ҳаракатининг фаол аъзоси. Бар ва салунларга болта билан бостириб кириб спиртли идишларни синдирган.

«Хинду» Донахью узоқ йиллар давомида «Детройт»-нинг энг яхши тўп узатувчиси бўлган. Тўғри, унинг тезлигини олдингидек деб бўлмасди, аммо ҳозир ҳам коптокни чирпирак қилиб берадиган машҳур зарбалари бор эди. Донахью шу тарзда қойилмақом қилиб тўп узатарди. «Макданиэлс»даги такасалтанглар эса майдонда худди тиззагача сув кечгандек юришар, занглаган эски кўча эшиги қишки изгирин шамолда бурилгани каби зўрға буришарди.

Ўйиндан сўнг кийиниш хонасида мен «ҳинду»нинг душ тагида янграган баланд овозини эшитдим:

– Сиз, ялқовларга ўша йигит бўлмаса, масофани айланиб чиқишида ютиш ҳам насиб қилмасди. Умуман, у ким ўзи? Фақат менга ўша йигитни «Макданиэлс»нинг канда қилмай келиб турадиган одами деманглар!

Бу «йигит»нинг Беттжер эканлиги тўғрисидаги овозалар яшин тезлигига тарқалди. Муюлишдаги кафеда дўстларим шундай дейишиди:

– Бетч, бу имкониятинг. «Хинду» Донахью сенинг ҳақиқий профессионал бейсболчи бўлишингга ёрдамлашиши мумкин.

Улар ҳар куни кечқурун Донахьюни кўриш учун боришим кераклигини айтиб, кўндиromoқчи бўлишарди. Аммо ҳар сафар шу ҳақда ўйласам, юрагим увишиб кетарди. Бир куни «Донахью» салунининг кириш эшигигача бордим, аммо барибир ичкарига қадам қўйишга ботина олмадим. Сўнгра кечки пайт менга йигитлар эргашиб боришиди. Айланиб очиладиган эшик ортидан «ҳинду»нинг гулдираган овозини эшитдик. Шерикларимдан бири мени бирдан қаттиқ итариб юборди ва барда тўғридан-тўғри Донахьюнинг орқа томонида туриб қолдим!

«Хинду» нима юз берганини кўриш учун ўгирилди.

– Сенга бу ерда нима керак? – бўкирди олий лиганинг собиқ питчери<sup>13</sup> худди ўн икки яшар болага танбех берадигандай.

<sup>13</sup> Питчер – бейсбол майдонининг марказида турувчи ўйинчи ва рақиб томоннинг тўпни бита билан уриб қайтарадиган хужумчисига копток отувчи.

– Жаноб Донахью, менинг исмим Фрэнк Бетчкер. Сизга қарши «Шутцен» паркида үйнагандым. Айтинг-чи, сиз мен-га бейсболчилик фаолияти билан шуғулланишда иш топиб берса олмайсизми? – дедим зұрга.

«Хинду» менга тикилиб қолди.

– Сен үшами, сени «Мақданиэлс» учун әркін үйинчи си-фатида таклиф этишганди, шундайми?

– Ҳа, сәр, – мен жилмайишга уриндим.

– Жин урсын! – деб гулдираб кулиб юборди у. – Мен сен учун исталған вақтда иш топиб бераман!

Бир неча кундан сүнг Пенсильвания штатидаги Жонста-ундан үйимга телеграмма келди. Унда менинг фамилиям «Бетчкер» (шундай жарапнұрларды) деб ёзилғанди:

«Жонстаун»да уч штат лигасыда үйнашингиз учун ми-нимал шарттарни зудлық билан жүнатынг.

МЕНЕЖЕР ЧАРЛЗ АТЕРТОН

Агар онам уйда бўлганида, мен бу телеграммани мутлақо кўрмаган бўлардим.

Ўша оқшом шунчалик эсанкираб қолғандимки, кечки овқатга зўрга кўл урдим. Кейинроқ Денахьюнинг ҳузурига кирдим. Дўйстларимнинг аксарияти мен билан бирга эди. «Хинду» телеграммани ўқир экан, елкамга қоқиб қўйди ва юзи ёришиб, хитоб қилди.

– Шу оқшомдан қолдирмай жавоб бер! Ойига 350 дол-ларга розиман, деб ёз!

Ридж-авенюдаги Вестерн Юнион телеграфига бораёт-ганимизда мен тугул улфатларим ҳам ҳаяжонда эди. Теле-графга киришдан олдин тўхтадим.

– Кулоқ солинглар, йигитлар, – дедим, – ҳозир мен ҳаф-тасига саккиз доллар ишлаб топяпман. Агар «Жонстаун» ойига 350 доллардан тўлашини билганимда, тўпни ушлаб ҳам олмаган бўлардим.

Ўртоқларим гапимни маъқуллашди ва биз «хинду» айтган маблағ миқдорини иккى бараварга оширдик. Телеграммани ўзимга келгани каби «Фрэнк Бетчкер» деб имзоладим. Шундай қилиб, мен бейсбол үйнагунимча «Бетчкер» бўлиб қолдим.

Ўша кеча ухлай олмадим. Эртаси тонгда қирқ даража иситма билан уйқудан уйғондым. Онам шу заҳоти яқындан шифокорга одам юборди. Шифокор ташриф буюришидан аввал менга телеграмма олиб келишди. Онам уни очди. Үнда шундай деб ёзилганди:

**ШАРТИНГИЗНИ ҚАБУЛ ҚИЛАМИЗ. ЖОНСТАУНГА ЗУДЛИК БИЛАН ТЕЛЕГРАММА ЖҮНАТИНГ.**

МЕНЕЖЕР ЧАРЛЗ АТЕРТОН

Онам юқорига чиқиб кетди. Мен тушунтиришга ҳаракат қилдим, аммо у йиғлаб юборди. Сүңг шифокор келди. У менинг оддий грипп билан оғриғаним, лекин бир неча күн тұшакда ётишим кераклигини айтди. Онам шифокордан менинг бейсболчи бўлишдан воз кечишга кўндиришини ялиниб сўради.

— Доктор, — деди у фифони ошиб, — Фрэнкнинг юраги заиф. Бу эса уни ўлдиради!

Доктор нима қилишини билмай қараб қолди. У мени илгари ҳеч қачон кўрмаганди. Стетоскопни қайта олди-ю, бу сафар диққат билан текшира бошлади.

— Болангизнинг юраги заиф деб ким айтди? — сўради у.

Онам шифокорга менинг туғилганимдан бўён касалланганимни айтиб берди. Бу хасталиқдан ҳеч қачон холос бўлмайди, деб ўйлар экан.

— Нимаям дердик, — онамни ишонтириди у, — агар ўғлингизнинг юрагида муаммо бўлган бўлса, ҳозир у бутунлай барҳам топган. Ҳозир юраги бутунлай соғлом.

Шифокор менга бир олам қувонч бахш этиб, Жонстаунга рухсат бериш кераклигини онамга уқтириди.

— Бу унинг учун жуда яхши бўларди! — деб таъкидлади шифокор.

Доктор Томас ўзининг қанчалик ҳақлигини, ҳатто тасаввур ҳам этмасди.

Жонстаунга боргач, кучли ва тайёргарлик кўрган жамоани кўраман деб ўйлагандим. Шундай бўлиб чиқди ҳам. Мен қарши ўйнаган биринчи «Вильямспорт» командаси Филадельфияда ўйинларини кўрганим олий лига жамоа-

лари сингари маҳоратли туюлди. «Вильямспорт» ўша иили учта штат лигаси чемпионатида ғалаба қозонди, унинг етти ўйинчиси олий лигага ўтиб кетди, уларнинг менежери Гарри Волвертон эса кейинчалик «Нью-Йорк янкиз» деб номи ўзгартирилган «Горцев» жамоасига менежерликка тайинланди.

Дастлабки ўйин мен учун анча оғир ўтди. Мен шу дара жада қўрқандимки, ўзимни Жонстаун тошқинида<sup>14</sup> қолган дай ҳис этдим. Менежер Чарли Аттертон, афтидан, мени тушунди. Камина учун у худди отамдек эди. Аттертон ҳар куни бор кучи билан ишончимни янада мустаҳкамлашга уринарди.

Кейинги ойнинг биринчи куни келди. Маош! Менинг профессионал бейсболчи сифатидаги биринчи иш ҳақим! Почтага югурдим ва онамга буюртмали хат жўнатдим, пул билан. «Онажон, энди сиз ишга бориб, овора бўлманг», – деб ёздим кўзларимда ёш билан. Бу ҳаётимнинг энг баҳтиёр дамлари эди.

Аммо эртанги кун мени қаттиқ ларзага солди: Чарли Аттертонни ишдан бўшатиши. Марказий филдеримиз<sup>15</sup> Берт Конн менежерга айланди. Кон биринчи ишини... мени четлаштиришдан бошлади.

У менга қуидаги гапларни айтганида, кўзлари худди муз каби совуқ эди:

– Фрэнк, бу ердан кетганингдан сўнг, нима билан машғул бўлсанг ҳам, Худо ҳақи, кўзларингни оч. Ишга кўпроқ жўшқинлик ва куч-ғайрат билан ёндаш.

Орадан ўн кун ўтгач, Пенсильвания штатидаги Честер шаҳрида мени Дэнни Миган номли собиқ бейсболчи «пай-қаб» қолди. Дэнни мени факат битта мусобақада кўрган, аммо бундан-да яхшироқ иштирок этишга муносаб, деб ҳисоблар экан.

– Оловсан, йигит! Сенда ғайрат тўлиб-тошиб ётиби!

<sup>14</sup> 1889 йилги сув тошқини Жонстаун шахрининг шимолий қисмини ювиб кетган. 2209 киши ҳалок бўлган, 1600 та уй вайрон бўлган.

<sup>15</sup> Филдер – ҳимояланаётган жамоа ўйинчиси, майдон ташқариси (майдоннинг ўнг, чап ва маркази)ни кўриклилайди.



Мен кулиб юбордим ва айнан ғайрат-иштиёқим (энтузиазм) йўқлиги учун ҳайдалганимни айтиб, Берт Коннинг унтилмас «панд-насихати»ни тақоррладим.

Хафта давомида Дэнни мени «Нью-Хейвен»га ўтиб, ўзимни синаб кўришимга кўндиришга муваффақ бўлди. Ёз-нинг жазирама кунларидан бирида Нью-Хейвенга келдим. Мени ҳаёт қайнаган кўчалар ва ишчанлик руҳидаги елиб-югуришлар ҳайратга солди. Нью-Хейвенни катта шаҳар деб сира ўйламагандим. У ерда фақат Йель университети жойлашганини билардим, холос. Коннектикутдаги таникли адвокат ва айни пайтда «Нью-Хейвен» бейсбол клубининг президенти ҳамда асосий соҳиби К.Ж.Данауэрнинг хонаси-га киришимга тўғри келди.

Мен унингофисини дарров топдим. Ўшанда дам олиш куни бўлиб, улкан қабулхонада ҳеч ким йўқ эди. Тўсатдан хоналардан бирининг эшиги очилди ва ичкаридан бир болачикиб келди.

Үзимни таништиридим. У индамай бурилди ва сал бўлмаса кулиб юбораёзди. Нима деганини эшитиб қолдим:

– Жаноб Даңауэр, Бетчер келди!

Жаноб Данауэр лип этиб сакраб чиқди. У қадди-қомати келишган, қимматбаҳо, ишга хос қора костюм кийган эркак эди. Мени кўриб, худди қоқкан қозиқдай тұхтаб қолди, ютинді ва сұнг кескин бурилиб, болага қичқирди:

— Қани Бетчер?

Бола қўрқиб кетиб, мени қўрсатди:

— Мана у, сэр.

Эркак мен томон үгрилди.

– Сен Бетчермисан? – саросимага түшиб сўради у.

Мен фақат баш ирғадим, холос. Күринишим бейхшовлигини билардим. Сочимни икки ой бурун калталашим керак эди, шунинг учун похол шляпамни ечмагандим. Бундай бошкайимни янги Англияда ҳеч ким кўрмаган – шляпа гардиши-нинг ўзи ярим дюйм (25,5 мм)дан иборат эди. Ўша ёзда мен ҳаддан ташқари озиб, умидсизликдан юзим бўшашганди, иштоним эса оқ кроссовкамдан икки дюйм юқорида туарди. Эрталаб поездда қанқайган бурнимнинг учидаги тошган

хусунбузарни сиқиб юборганимдан сўнг бурним шишиб, икки баробарга етган, ғалати кўриниш пайдо бўлганди! Бу қиёфам, боз устига бесўнақай жомадоним билан истиқболи дуруст бейсболчига, жаноб Данавэрнинг тасаввуридаги инсонга мутлақо ўхшамасдим...

Агар мени тавсия қилган шўрлик Дэнни Миган шу ерда мазкур лаҳзаларда пайдо бўлганида борми, уни уриб ўлдиришлари тайин эди. Данавэр йўғон, гулдираган товуш билан:

– Бизнинг лигада ЭРКАКЛАР ўйнайди! – деб юборди ва дераза томонга ўгирилди.

Бироз вақт ўтгач, у менга ҳануз орқа ўгириб турганча, шундай деди:

– Миган сизни шундай таърифлагандики, биз кеча кечқурун ўзимизнинг иккинчи бейсменимиз Фитцджерални «Гигант»га жўнатиб юбордик.

Жимлик чўқди. Бирдан жаноб Данавэр ўзининг хонасига қараб йўл олди ва ортидан эшикни ёпди. У беш дақиқалар чиқмади. Бу менга худди бир соатдай туюлди.

«Мен аҳмоқ бўлиб Честердан нима учун келдим? – деб ўйладим алам билан. – Нега худди «Жонстаун»дагидек мақомга эга бошқа лигада яхшироқ ўйнай оламан, деб ўйладим-а?»

Шу лаҳзада жаноб Данавэр яна чиқиб, мени саволи билан довдиратиб қўйди:

– Овқатланишни истайсанми, ўғлим?

Унинг ҳақиқатан ҳам менга раҳми келганди.

Ўша бино ертўласидаги кичкина ошхонага тушдик. Баланд стол олдида тик туриб, ҳар биримиз бутербродни қаҳва билан тановул қилдик. Бутунлай чўккан жимлик ичиди. Жаноб Данавэр менинг шишиб, устига-устак оғриётган бурнимга қараётганини ҳис этдим. Нихоят у мендан сўраб қолди:

– Ёшинг нечада?

– Ўн саккизда, – жавоб бердим мен.

– Сени шу ёшга кирган деб бўлмайди, – ишонқирамай деди у. Сўнг оҳиста қўшиб қўйди: – Бугун нима қилишимиз-

ни билмай қолдим. Бизда иккинчи базада ўйнай оладиган одам йўқ.

— Нега менга шу бугуннинг ўзидаёқ... имконият бермаяпсиз? — Кўзларимда ёш ғилтиллади.

Кейинчалик, агар «имконият» сўзини қўлламаганимда, у мени синамасдан ортимга қайтариб юборарди, деб ўйлаб юрдим ҳамиша...

Жаноб Данауэр мени Савин-Роқда жойлашган стадионга олиб борди. Кўп ўтмай, ечиниш хонасининг бурчагидаги курсида ўтирадим. Президент эса жамоа сардори Жерри Коннел билан гаплашарди. Жерри худди Рокки Марчиано<sup>16</sup> каби жуссаси пишиқ киши эди. У мен томонга жиркангандек икки марта қараб қўйди. Сўнгра бир оғиз гапирмай, олдимга келди ва Фитцжеральд либосини тиззамга ташлади!

Ўша дақиқаларда кўпгина ўйинчилар аллақачон майдонда эди. Томошагоҳдаги шовқин менгача эшитилиб турарди. Либосни кияр эканман, яна бир бор Жонстаундаги каби кўркув ва асабий зўриқишини ҳис этдим. Берт Коннинг: «Кўзларингни оч. Ишга кўпроқ жўшқинлик ва ғайрат-шижоат билан ёндаш!» – деган сўзларини гўё у ёнимда ўтириб айтгандек эшитдим. Сўнгра Дэнни Миганнинг: «Сен оловсан, йигитча, турган-битганинг олов!» – дегани қулогимга чалинди.

Берт Конн ва Дэннининг сўзлари қолган барча фикрларни сиқиб чиқаргандай бўлди. Мен, гарчи сояда ҳарорат 36 даражада бўлса-да, майдонда худди ўқлангандай тўхтovsиз югурадим. Тўпни бошқа инфилдерларга милтиқдан отилган каби иргитардим. Бу ниҳоятда ҳаяжонга тўла якуний ўйин эди. 3:3 ҳисобида дуранг кечётган саккизинчи иннинг ва икки аутда базадан чап майдонга тўп улоктирдим, биринчи базадан худди телбадай ўтиб кетдим. Иккинчисига олға ташланиб, базага шундай тезликда кириб бордимки, тўп иккинчи бейсмендан сирғаниб тушиб кетди. Мен гўё эсини йўқотиб қўйган кишидек ўйнашда давом этардим.

<sup>16</sup> Рокки Марчиано (1923 – 1969) – 1952 йилдан 1956 йилгacha профессионал бокс бўйича жаҳон чемпиони.

Учинчи база ва уйда ҳам худди шу ҳол рўй берди, шундай қилиб мен масофани айланиб чиқдим ҳамда бир очкони кўлга киритдим!

Ўйинчилар менга қутурган ит занжирдан бўшаб кетгандек ўйнаганимни айтишиди.

Жаноб Danaуэр томошагоҳдан пастга тушди. Панжарадан энгашиб, зўр иштиёқ билан қўлимни қисди-да, қулогимга қичқирди:

– Яшавор, йигит! Худди шундай руҳда давом эттири! Томошибинлар сени жуда яхши кўришади!

Менинг масофани айланиб чиқишим ўйинда ғалабага олиб келганди. Эртаси куни Нью-Хейвен газеталари шу чоққача мисли кўрилмаган динамо-одам тўғрисида ёзиди! Улар мени Бетчер «қалампир», жамоанинг қалби деб атай бошлади! Мен газетадан қирқиб олинган парчаларни, биласизми, кимга юбордим? Жонстаунга! Берт Кон уч ҳафта бурун ялқовлиги учун ўзи ҳайдаб юборган лапашанг Бетчер «қалампир» тўғрисида ўқигач, унинг юзи қай даражада ўзгариб кетишини тасаввур қилиб кўринг.

Мен ялқов эмасдим – эсанкираб қолгандим. Мени айнан қўрқув ушлаб турганди. Аммо ҳеч кимга эътибор бермасдан ҳаракат қилишга қарор қилганимдан сўнг, жizzакилигим ўзимнинг манфаатимга ишлай бошлади. Қўрқувим файрат-шижоатга айланди!

Мен, шунингдек, умумий сарлавҳа билан берилган бир неча кичик хабар ва мақолаларни газетадан қирқиб олиб, хат билан бирга Миганга жўнатдим. Бу мактубимда ўша куни ўйин олдидан ечиниш хонасида унинг товушини эшитганимни баён этгандим... Аммо у шунга қарамай ҳатимни ололмади. Бояқиши Миган ўша кунда ота-боболари хузурига йўл олган экан (вафот этган маъносида – таржимон). Бу воқеа, кейинроқ эшитиб билишимча, мен айнан «Нью-Хейвен» ғалабаси учун майдонга чиқкан вақтда юз берган.

## Учинчи бўлим

### МЕНИНГ ТЎП УЗАТИШ КЎРСАТКИЧИМНИ 0,238 ДАН 0,300 ГАЧА ОШИРГАН ҲАМДА ОЛИЙ ЛИГАГА «ЎТКАЗГАН» ФОЯ ХУСУСИДА

Кўп ўтмай Нью-Хейвендаги мавсум ёпилгач, биринчи эшелоннинг учинчи лигаси – Иттифоқ лигасини тузишга киришиб кетишиди. «Нью-Хейвен»нинг юлдузи ва биринчи бейсмени Сэм Кеннеди «Балтимор»нинг менежери этиб тайинланди. Сэм мен билан учрашиш учун Филадельфиядан келди. У менга янги лигада ўйнаш учун ёзилган Миллий ҳамда Америка лигаларидаги кўплаб ўйинчиларнинг рўйхатини кўрсатди. Сэм рад қилиш мумкин бўлмаган жуда яхши таклиф киритди. У шундай деди:

– Фрэнк, сен олий лига ўйинчиси бўласан!

Ва мен «Балтимор»га ёзилдим.

Йил бейсбол мавсуми учун ёмғирларга ниҳоятда сероб келди. Бир сафар тўхтовсиз ўн кун ёмғир ёғди. Катта маошли бейсболчилар меҳмонхона залларида зерикиб қолишиди. Баъзан ўйин ўтказишга муваффақ бўлинар, аммо ҳаво шу қадар совуқ ва рутубатли эдики, томоша қилиш учун кам одам ташриф буюради. Шу тариқа Иттифоқ лигаси барбод бўлди. Мустақиллик кунида кетма-кет икки ўйинни ўтказган профессионалларнинг янги лигаси ўзини касодга учраган деб эълон қилди ва ўз-ўзидан тарқалиб кетди.

Ташкил этилган бейсболдаги барча «қочоқ» ўйинчилар бир йил давомида қора рўйхатга тушиб қолишиди. Шу боис мен мавсумнинг қолган қисмида Пенсильваниядаги «Хейзелтон»да «қонунга хилоф» фаолият юритаётган Атлантика лигасига ўтиб ўйнадим. Келгуси или хукукларим тиклангач, Шимолий Каролина штатининг «Гринвилл» жамоасига қабул қилиндим. Ўша пайтда у профессионал бейсболнинг қуий лигасида эди.

Аммо доимо бўлганидек, ҳар қандай нохушлиқда ҳам бир эзгулик бор. Мен жамоани яхши кўриб қолдим. Одамлар ҳам менга худди қиролдай муносабатда бўлишар,

ваҳоланки, зарбаларим унчалик қовушмасди. Бир куни менежеримиз Томми Стач шундай деди:

— Фрэнк, агар сенинг зарбанг яхши бўлганида борми, олий лигадагилар ортингдан югуриб юришарди.

— Зарба беришни қандай ўргансам бўлади? — сўрадим мен.

— Бор ғайрат-иштиёқнинг зарбага сарфла, ана шунда ўрганасан, — жавоб берди Томми.

Мен уни ҳазиллашяпти, деб ўйладим.

— Қандай қилиб зарбага иштиёқни қўллаш мумкин? — сўрадим ҳайрон бўлиб.

— Кўпроқ машқ қилишинг керак, — тушунтирди Томми. — Ҳар куни эрталаб стадионга боришинг ва уч юз марта тўп оширишни машқ қилишинг лозим. Бунинг учун ғайрат керак ахир, шундай эмасми?

Зарбаларга ғайрат-шижоатни қандай қилиб қўллаш кераклигига менинг сира ақлим етмасди. Энди эса бу ғоя шунчалик маъқул тушдикни, натижада жамоанинг бир неча ўйинчисини ўзим билан бирга боришга кўндиromoқчи бўлдим.

Улар, сен ақлдан озиб қолибсан, дейиши: бирорта ҳам шимоллик жанубнинг жазирама қўёшига эрталабдан кечгача чидай олмасди. Ётоқхонадаги кўшним Айви «Хинду» Унго Жоржия штатининг Уэйкросс деган жойидан бўлиб, юзига сепкил тошган малласоч ёш йигит кетчер<sup>17</sup> эди. У мен билан бирга уриниб кўрмоқчи бўлди. Биз бир неча танга ишлаб олишга йўқ демайдиган ўсмирларни топдик ва тонг отар-отмас, қўёш қиздирмасдан йўл олдик. «Хинду» билан ҳар биримиз уч юзтагача тўп ошириш машқини амалга оширидик ҳамда вақтни ғоятда кўнгилли ўтказдик.

Машғулот бошида менинг тўп узатиш кўрсаткичим 0,238 га teng эди, яъни зарба бериш учун битани йигирма бир марта силкитганимда ўртacha бештаси тўпга тегарди. Фарқ ҳар йигирмата оширишда бор-йўғи битта қўшимча тўпни уришни ташкил этди. Аммо мавсум охирида бу арзимас та-

<sup>17</sup> Кетчер — уй майдонида тўпни бита билан уриб қайтарадиган хужумчи ортида турувчи ўйинчи. Питчер узатган тўпларни қабул қиласди.

фовут ўртача кўрсаткичимни 0,300 га кўтарди ҳамда Каролина лигасининг бошқа ҳар қандай ўйинчисидан кўра менга кўпроқ тўпни зарб билан уриш имконини яратди. Натижада ажойиб кунларнинг бирида эрталаб «Сент-Луис кардиналс» жамоасига бориб қўшилиш учун Нью-Йоркка кетаётган поездда ўйғондим.

Нью-Йоркка «кардиналс» бўлиш учун келганимдан сўнг орадан бир соат ўтгач машҳур «Поло граундз»да жуда ажабтовур, олий лига тарихида мутлақо рўй бермаган воқеа, «хоҳ ишонинг, хоҳ ишонманг» қабилидаги ҳодиса рўй берганди!

Ечиниш хонасида менежер Рожер Бреснаган билан учрашдим. У мени бошқа ўйинчилар билан таништириди. Аксарият йигитлар майдонда машқ қилишар, уларга қўшилганимда кимлигимни ҳеч қайси билмади ҳам. Ўйин бошланди, мен эса «Сент-Луис кардиналс» либосини кийиб, улуғ ўйинчилар, ўзим ҳамиша ҳавас қиласидиган кишилар билан ёнма-ён ўтирадим. Орзум рўёбга чиққанди. Ўзимни қанот чиқаргандай ҳис этдим.

Стадион трибуналари ишқибозлар билан лиқ тўла, бунақасини сира кўрмагандим. Бейсбол ўйнаш учун ҳавас қилгулик кун бўлганди. Мен асло асабийлашмасдим, чунки ўйинга жалб этилмагандим (шундай ўйда эдим). Ўтириб олиб, томошадан завқланардим, холос. Бунинг учун тагин менга ҳақ тўлашарди! Кристи Матьюсон «Гигантлар»да тўп оширувчи эди... унутилмас Кристи Матьюсон тўпни қайтариб бўлмайдиган қилиб узатувчи таникли ўйинчи, бейсбол тарихида энг улуғ тўп оширувчи деса ҳам бўлади. «Улуғ сардор» ҳиндур Мейерс эса қабул қилувчи эди. Машҳур рефери Хэнк О’Дей «уй»да туриб, бол<sup>18</sup> ва страйларни<sup>19</sup> эълон қиласиди. У ерда яна «Гигантлар»нинг атоқли менежери Жон Магги Макгроу ҳозир бўлиб, ўйинчилар ўринидиги олдида нари-бери бориб турарди. Барчаси

<sup>18</sup> Бол – зарба бериш чегарасидан ташқарига узатилган тўп ва қайтарувчи нинг бита билан берган зарбаси мўлжалга тегмаган тўпни англатади.

<sup>19</sup> Страйк – қайтарувчи тўпни уролмаган ёки майдонга қайтаролмаганда ҳакам томонидан ҳисобга олинадиган хатолар.

мен йиллар давомида ҳавас ила томоша қилишни ёқтирган расмлардагидек яққол намоён эди.

«Кардиналлар» жамоасининг сардори ҳамда иккинчи бейсмени Миллер Хаггинс чиллак (бита) билан турарди. У ўйин бошланиши олдидан Матьюсон ҳакам Хэнк О'Дей билан суҳбатлашганидан бехабар эди. Матьюсон ҳакамга эрталабки газетадан қирқиб олинган парчаларни – Хаггинснинг сурати ҳамда лиганинг бошқа ўйинчиларига нисбатан бу мавсумда масофани кўпроқ айланиб чиққани ҳақида ёзилган мақолани кўрсатганди.

– Қулоқ сол, Хэнк, – деди Матти, – биласанми, нима учун Хаггинснинг масофани айланиб чиқиши бунчалик кўп?.. У базада бошқа ҳар қандай ўйинчидан кўпроқ туради, чунки питчер узатган ноаниқ 4 та тўп узатишдан сўнг базани ўзгартириш хукуқини кўлга киритади! Гапни Хаггинснинг бўйи атиги беш фут, опти дюйм бўлганидан бошлаймиз. Бунинг устига у майдончада энгашиб туради. Тўп учиб келаётганини кўргач, йирик қадам ташлайди ва зарба бериш учун «шўнғийди»... У ўзини бошқаларнинг ўрнига қўйиб кўрсин. Бор куч билан ҳаракат қилиб копток улоқтирилганда, уни страйк деб ҳисоблашдан олдин ўйлаб кўриш керак. Хэнк, сендан фақат Хаггинс ўзи ёқтирган ҳолатда туриб, тўпни уришга ҳозирланганда страйк белгилашингни илтимос қиласман!

Турган гапки, Хаггинс мазкур гаплардан бехабар бўлиб, доимидек, майдонда бироз энгашиб турарди. Матьюсон куличини ёзди-да, тўпни даҳшатли тезликда тўғридан-тўғри база марказига йўллади. Аммо Хаггинс катта қадам ташлаб, зарба бериш учун шўнғиганида, копток аллақачон унинг бошидан бир фут баландликда эди!

– Страйк, – деб қичқириб юборди Хэнк О'Дей.

– Нима учун? – алам билан жеркиб сўради Хаггинс, сўнг орқага сакраб, юзини ҳакамнинг бурни тагига олиб борди.

Пакана Хаггинснинг фақат оғзи катта бўлиб, бунақасини мен ҳеч қачон кўрмагандим.

Ўриндиқдан унинг калласи худди эшик ошиқ-мошиғи каби бўйнига маҳкамлангандек кўринар, ҳар сафар улкан

оғзини очганида, калласи ана шу эшик ошиқ-мошиғида паст-баландга ҳаракат қилаётгандай туюларди.

Хэнк О'Дэй, ҳатто киприк қоқиб ҳам қўймади. Ниҳоят аччиқланган Хаггинс тўп узатаётган майдонга қайтди. Чиллакни ғазаб билан базага бир урди-ю, яна қоматини энгаштириб туриб олди.

Матьюсон барини жуда яхши назорат қиласарди. У тўпни яна даҳшатли тарзда ўша нуқтага узатди. Хаггинс тағин ўзининг катта қадамини ташлади ва шўнғиди – тўп унинг боши узра бир фут баланддан учиб ўтди.

– Иккинчи страйл!! – хитоб қилди Хэнк О'Дей.

– Нима учун? – бўкириб юборди Хаггинс қаддини ростлаб ва ҳакамга худди шақилдоқ илон сингари отилди. Унинг улкан оғзи гўё О'Дейнинг юзига олов пуркагандек бўлди.

Шунда ҳакам қўли билан «Кардиналлар» ўринидиги томонни кўрсатиб деди:

– Сен аутдасан!

Хаггинс гўё ҳакамнинг бошига туширмоқчи бўлгандай чиллакни даст кўтарди. Аммо Хэнк уни қўли билан оҳиста ечиниш хонаси томон йўллади. Шунда Хаггинс ўриндиқ тарафга шошилди. Агар ҳакам ишора билан ечиниш хонасини кўрсатганида борми, Хаггинс стадионни тарқ этиб, ўз-ўзидан ўйинда қатнашишдан ўн кунга марҳум бўларди. Шунча кун унга маош ҳам тўланмасди.

Воқеалар янгича тус олди! Бреснаган ўриндиқда ўтирган ўйинчиларни кўздан кечирав экан, олдинга қараб энгашди. Мен охирида ўтирадим, кўзларимиз тўсатдан учрашиб қолди.

– Бетчер! – қичқириб юборди у. – Бориб чиллакни олгин-у, Хаггинснинг ўрнига тўп узатишни бошла!

– Менми? – сўрадим ўзимни йўқотиб.

Бреснаган тасдиқлаган каби бош иргади.

Тўпни *Кристи Матьюсон* узатарди!

Чиллакни Гринвиллдан маҳсус олиб келгандим. Уни шу пайтгача қўлимда ушлаганлар орасида энг яхшиси, деб ҳисоблардим. Аммо азбаройи ҳаяжонланганимдан бу чиллакни топа олмасдим. «Кардиналлар» ўринидиги олдида

жуда күп чиллак қўйилган, улар бутун Каролин лигасига ҳам етиб ортарди! Мен биринчи дуч келган чиллакни чанглладим-у, майдон томон йўл олдим. Юриб борарканман, тиззаларим қалтираб, қўлимдаги бита ҳаддан зиёд оғирлашиб кетгандай бўлди. Мени ожизлик қамраб олди. Худди баланд тепаликка кўтарилаётгандек бўлдим ва уни ошиб ўтишга менда ҳеч қандай ишонч йўқ эди.

Ўшанда овоз кучайтиргичлар мавжуд эмасди. Ҳакамлар улар ўрнини босарди! Ҳэнк О’Дей мени танимас, шу боис, базага етганимда, олдимга келди ва сўради:

– Исминг?!

Мен шунчалик гангиб қолгандимки, ҳатто гапира олмасдим.

– Исминг деялман! – такрорлади Ҳэнк юзимга тик қараб.

Бироқ мен, ҳатто ютина олмадим ҳам.

Ҳэнкнинг юзидаги жирканишни ҳеч қачон унута олмайман. У менга орқасини ўгириб, кепкасини ечди. Сўнг матбуот ходимлари ўтирган жойга назар ташлади ва гулдираган товушда бақириб юборди:

– ҲЕЧ КИМ... Ҳаггинснинг ўрнига тўп узатади!

Шу ўринда айтишим керакки, мен ҳақиқий профессионаллар бутси тиши лой бўлса, чиллак билан уриб туширишини эслаб қолгандим. Ҳозир тишларга илашадиган лойнинг ўзи бўлмаса-да, ҳар қалай ҳақиқий профессионаллардай кўрингим келди. Шу боис, база майдончасида турганча, хотиржам кўринишда чиллак билан бутсига ура бошладим. Аммо бир камчиликка йўл қўйгандим: ҳақиқий профессионал ўйинчилар бу ишни ҳеч қачон базада туриб қилишмаган экан!

Шундай қилиб, мен пастга қараган кўйи бутсининг остки қисмини таққиллатар эканман, Матьюсон коптокни иргитди. Бошимни кўтариб қарасам, тўп тўппа-тўғри калламга томон учуб келяпти. Зарба бериш учун шўнғидим, аммо у машҳур «қайтариб бўлмайдиган» тарзда узатилган тўп эди ва тўғридан-тўғри базанинг ўртасига бориб тушди.

– Учинчи страйл! Сен аутдасан! – деб бақириб юборди Ҳэнк О’Дей.

Бейсбол тарихида биринчи марта олий лигадаги ўйинчи биринчи берилган коптоқдан аутга чиқиб кетганди!

Орқага қайтишда, жамоа ўриндиғида Макгроунинг қичқириғини эшитдим:

– Мен айтмагунча ҳеч қаерга қўл қўймагин!

Ўриндиқда ўтирган ўйинчилар ҳаяжонланиб қотиб қолишганди. Бреснаган сув совутгич идиш олдида бир қўлида стакан тутганича оёгини нов устига қўйган, сув оқиб тушаётганини, афтидан, анчадан бери сезмасди.

– Қани, Бетчер, буни ичиб юбор-чи, – деди у салобатли овозда. – Майдонга тушган пайтингда мен буни сенга атаб тўлдириб қўйгандим!

Ўша тунда меҳмонхонада ўйинчилар шунчалик жонимдан тўйдириб юборишидик, кечки овқатга келганимга роса пушаймон едим. Аммо кечки овқатдан сўнг ҳайратга соладиган воқеа юз берди.

– Сен хонада ким билан турибсан, Бетч? – деб сўради Миллер Хаггинс мени йўлакка чақириб чиқаркан.

Билмайман, деб жавоб бердим, чунки ҳали хона беришмаганди.

– Мен билан бир хонада турсанг, қарши эмасмисан? – таклиф қилди у.

– Жуда яхши бўларди! – жавоб бердим мен.

Хаг меҳмонхона дарбонининг олдига борди ва бир неча дақиқадан кейин қайтди. Менга калитни берар экан:

– Жомадонингни юқорига олиб чиқ, – деди.

Кейинроқ Хаггинс нега мен билан бир хонада туришга қарор қилганини айтиб берди. Маълум бўлишича, унинг хонадоши ҳаддан зиёд кўп вайсар экан. Хаг мендан нима кутаётганини айтди. Унга панд бермадим.

Хаггинс қандай фикр юритишини англамоқчи бўлдим. Ва тушундим. У барчасини атрофлича ўйлаб кўрарди! Хаггинс камгап одам эди. Маълумотли, коллежни тугатган, ўзининг қадрдон шахри Цинциннатида амалиётни ўтаган. У мен билган бейсболчиларнинг энг иқтидорлиси эди. Мен ўрганишга чанқоқ эдим. У ҳеч қачон саволларимдан чар-

чамас, назаримда, менинг тимсолимда дунёдаги энг яхши тингловчини топиб олгандек эди.

Бир сүз билан айтганда, мендай ғүр бола баҳтга белан-гандай күринди. Мазкур давр ҳәётимдаги энг баҳтиёр дамлар эди. Нима учун шундайлигини бу ҳақда сизларга кейинроқ батафсил сўзлаб берганимдан сўнг билиб оласиз.

### Тўртинчи бўлим

## МЕН «ҲИНДУ» УИНГОНИ ҚАЙТАРИШГА МУВАФФАҚ БЎЛДИМ

Ўйлайманки, Гринвиллдаги ётоқдош кўшним Айви «ҳинду» Унго билан рўй берган воқеаларни билиш сиз учун қизиқ бўлса керак. Унинг ёши бор-йўғи ўн саккизда бўлиб, ажойиб ҳурпайган малласоч, миллионлаб сепкил ва кишининг завқини келтирадиган табассум соҳиби эди. Шунингдек, Унго менинг бейсболчилик қобилиятим борасида ўта ҳаяжонли тасаввурга эга эди.

Мен ҳеч бўлмаганда, «ҳинду» тасаввуридаги кишининг лоақал ярмича бўлишга ҳаракат қиласадим. У Гринвиллнинг қаериадидир пайдо бўлсан, мени худди қаҳрамондай кўриб ҳамиша ортимдан изма-из юарди. Даставвал, бу менга ёқди, ҳатто хушомаддай кўринди, аммо охир-оқибат ғашимга тегди ва ундан ўзимни олиб қоча бошладим.

Лекин Гринвиллни тарқ этиб, Сент-Луисга ўтганимдан сўнг Унгони қўмсай бошладим. Шунда «ҳинду»ни беихтиёр бамисоли тумордай қабул қилганим ва у менинг бейсбол бўйича эришган мавқеимга қанчалик ёрдам берганини англаб етдим. «Ҳинду»нинг қобилиятим борасидаги ҳайратда қолдирадиган ишончи мени руҳлантириб юборди. Масалан, агар оғир пайтларда тўпни узатишими га тўғри келганда, базада ўйинчилар бўлган вақтда Унгонинг кучли ҳаяжони менга далда берар ва зарбам албатта муваффакиятли чиқади деган ишонч туғдиради. Мен чиндан ҳам унга панд беролмасдим.

Энди эса Сент-Луисда ўриндиқни артиб тозалайдиган янги ўйинчилардан бири әдим, холос. Ўриндиқдан туриб зарба бера олмасдым, чунки чиллак ҳаддан зиёд калта әди. Олий лигада фарқ қиласынан ягона жиҳатим – мени битта узатган түпим учун аутга чиқариб қўйишганди.

Шунда, агар «ҳиндур» Уинго ёнимда бўлганида, менинг қанчалик яхши эканлигимни бу профессионалларга гапириб берарди, деб ўйладим. Қандай бўлмасин, «ҳиндур»ни қайтариб олиб келишим керак!

Кейин баҳтсиз ҳодиса юз берди. «Кардиналлар»нинг түп қабул қилувчи дубблёр ўйинчиси Жек Блисс оёғини синдириб қўйди ва мавсум охиригача ўйиндан чиқди. «Кардиналлар» Милуокидан Келли исмли кетчерни сотиб олишди. Мен бир неча кун давомида Келлини машғулотлар пайтида кузатдим. Уинго билан солиштирганда, у менга худди «секинлаштирилган кино»дек кўринди.

*Бу менинг «ҳиндур»ни қайтаришум учун яхши имконият әди.*

Мен Бреснаганга Уинго тўғрисида гапириб бера бошладим.

– Рожер, у жуда ёш, лекин бейсболда энг машҳур түп қабул қилувчи бўлиб етишади. Дунёдаги бирорта кетчерда учрамайдиган ушлаб олиш хусусиятига эга!

– У Келлига нисбатан яхши ушлай оладими? – деб сўради Бреснаган.

– Билмадим, – жавоб бердим мен. – Келли қандай ушлаб олганини ҳеч қачон кўрмаганман (Келлининг түпни қабул қилишидан фақат машғулотларда ҳамда питчерларнинг чигилини ёзишда фойдаланишарди).

Ҳа, мен Келлини машғулотда қанчалик кўп кўрганим сари, Уингонинг ҳар томонлама устунлигига шунчалик кўпроқ ишонч ҳосил қиласдим. Қулай пайт келган заҳоти Бреснаганга гренвиллик ётоқдош қўшним тўғрисида сўзлардим. Бу ажойиб менежер менга ҳар сафар бир хил савол берарди:

– У Келлига нисбатан яхши тутиб оладими?

Мен ҳам ҳар сафар бир хил жавоб берардим:

– Билмайман. Келли ўйинда тўпни қандай тутишини ҳеч қачон кўрмаганман.

Шу билан бирга мен захирадаги ўйинчилар ўриндигини деярли тарк этмас, бутунлай умидсизликка берилгандим. Ишончимни уйғотадиган одам учун ҳаммасига тайёр эдим. Бир куни шундай дедим:

– Унгро зўр зарба беради. У чап томондан узатади ва қисқа масофага ажойиб зарба бера олади.

Шунда Рожер бошқача савол бериб қолди:

– У фол чизигидан ташқарида тўп билан қандай ўйин кўрсатади?

– Қойилмақом тарзда, – жавоб бердим мен. – Тўпни тутишда кроссовка кийиб ўйнайди.

– Нима учун? – ҳайрон бўлиб сўради Рожер.

– Гринвиллда, – изоҳ бердим мен, – стадион томи минбарнинг орқа томонидан фақат ярмини ёпган, холос. Ишқибозларни майдон чегарасидан ташқарига учадиган тўплардан ҳимоя қилиш мақсадида минбарнинг олдинги панжарасидан томгача оғир металл тўр тортилган. Тўр ўртароқда бироз осилиб қолганди. Узатувчи зарба берган лаҳзада тўп минбарга қараб учди, Унгро юзидағи ҳимояла-нувчи ниқобни ечиб ташлади-да, минбар томон ўқдек отилди ва тўрга сакради. Ҳамманинг боши узра осилиб турган тўрга тирмашиб чиқиб, томошибинлар телбалардек ўринларидан туриб бақираётганларида, коптокни тутиб олди.

**Бу галим ўз НАТИЖАСИНИ БЕРДИ!**

Атиги бир неча кун ўтгач Бреснаган ўйинда ўнг қўлининг бош бармоғини синдириб кўйди. Шифокор унга ўйиндан икки-уч ҳафта четланишга тўғри келишини айтди. Кейинги куни Бреснаган йўқолиб қолди. Кимdir, Рожер «ов»га жўнади, деди.

Орадан ўн кун ўтгач, биз Цинцинатида ўйнайдиган бўлдик. Ўйин пайтида Рожерга кўзим тушди. У минбар остидан чиқиб, бизнинг ўриндиғимизга келиб ўтирди. Эгнида янги башсанг спорт костюми бор эди.

Ўша куни учинчи базада ўйнаётгандим. Иннинг тугагач, Рожер менга ҳадя қилган ҳар қачонгидан ҳам ажойиб дўстона жилмайиши билан олдимга келди.

– Мен Уингони ёлладим, – деди у.  
– Сен, Уинго биз билан бирга кетади, демоқчимасман?  
– қичқириб юбораёздим мен.  
– Худди шундай, – жавоб берди Рожер жилмайиб.  
– Хўш, у сенга маъқулми? – сўрадим мен ҳаяжонга тушиб.  
– Менимча, Уинго жуда ажойиб, навқирон кетчер, – деди Бреснаган. – Фақат сен қанақа бемаъни гапни айтгансан-а? Мен Гринвилда бутун бошли ҳафтани ўтказдим, лекин унинг бирор марта тўрга осилиб чиқсанига кўзим тушмади.

### Бешинчи бўлим **МЕН ҲАЁТНИ СУФУРТАЛАЙДИГАН КИШИГА АЙЛАНДИМ!**

Менинг папкамда газетадан қирқиб олинган бир парча бор. Унда коптокни 356 фут 9 дюймга улоқтирганим тўғрисида ёзилган, бу жаҳон рекордидан бор-йўғи 14 ярд<sup>20</sup> кам, холос. Ўз даврида мазкур кўрсаткич бейсболда энг узоқ улоқтириш бўйича иккинчи ҳисобланган. «Кардиналлар» сафида ўтказган икки йилдан сўнг Чикагодаги ўйинлардан бирида «Буқалар» жамоаси аутфилдери<sup>21</sup> Фрэнк Скулте кутилмагандан учинчи база чизиги яқинига тўпни чирпирак қилиб йўллади. Мен базага бор кучим билан чопиб кириб, коптокни ушладим ва уни биринчи базага ташлашга уриндим – у қарама-қарши йўналишда эди. Бирдан елкамда нимадир қисирлаб кетди. Мен иккинчи базада Хаггинста қараб қичқирдим:

– Хаг, уларга айт, бу томонга энди оширишмасин.  
– Нега? – деб бақирди Хаггинс бунга жавобан.

Мен унга ишора қилиб, қўлимга нимадир бўлганини кўрсатдим.

Хаггинс тўппа-тўғри Бреснаганнинг олдига бориб:

<sup>20</sup> 1 фут тахминан 30,5 см; 1 дюйм – 2,5 см; 1 ярд – 91,4 см га teng.

<sup>21</sup> Аутфилдер – бейсбол ўйинида майдондан ташқаридағи ўйинчи.

— Фрэнкни учинчи базада алмаштирганимиз маъкул. Унинг жароҳати бор, — деди.

Ўшанда унчалик жиддий туюлмаганди, аммо кечга бориб, ҳатто овқатланишда ҳам қўлимни кўтара олмай қолдим.

Бейсболчини ҳеч нима жароҳатланган қўл каби хўрлаб, унга азоб бермайди. Менинг қўлим келгуси мавсумда ҳам тузалмади. «Сент-Луис» ўз ҳолимга ташлаб, келишилган нархда сотмоқчи бўлди. Аммо Миллий лига жамоаларидан бирортаси ҳам мен билан қизиқмади. «Кардиналлар» мени Канаданинг Халқаро лигага ўйнайдиган «Монреал» жамоасига вақтинча бериб турди.

Мен Хаггинс билан хайрлашар эканман, у шундай деди:

— Фрэнк, бундай қўл билан бизнинг ўйинда ҳеч нима қила олмайсан. Ҳали ёшсан. Шундай экан, нима учун бошқа ниманидир ўрганмаслигинг, бирор иш билан шуғулланмаслигинг керак?

Монреалда майдоннинг ўнг томонида ўйнадим. Тўп аутга чиқиб кетганида, иккинчи бейсмен уни орқага қайта-риш, ички майдонга йўналтириш мақсадида мен томонга ташланди. Бу менинг вазифамга киради, аммо уддалай олмадим.

Орадан бир неча ҳафта ўтгач, менежер Китти Бранс菲尔д олдимга келиб, шундай деди:

— Фрэнк, сени президент кўрмоқчи.

Президентнинг исми Литченстайн эди. У муқаддас Лаврентий дарёсидаги бир нечта кемалар соҳиби бўлиб, тижорат билан муваффакиятли равишда шуғулланарди. Мен президентнинг қирғоқ бўйидаги хонасига кирганимда, у бошини ҳам қилганча у ёқдан-буёқча юрар, қўлини орқасига қилиб котибасига ниманидир айтиб ёздирарди. Бўйи анча паст бўлиб, Наполеоннинг ўзидан ҳам кўпроқ Наполеонга ўхшарди.

Индамай туравердим. Бир неча сониядан сўнг президент менга назар ташлади-да, шундай деди:

— Фрэнк, назаримизда, сенинг қўлинг бундай совуқ иклимда ҳеч қачон ўнгланмайди. Шамол бўладиган кунлар

ниҳоятда күп. Биз, агар сен Жанубга борсанг, иссиқ иқлим күлингни даволайди ва имконият пайдо бўлади, деб ўйлаймиз. Кеча кечкурун мен Сент-Луисга қўнғироқ қилдим, Бреснаган билан гаплашдим. Улар сени Чатануга, Жанубий лигага жўнатишга қарор қилишди.

Котиба менга конверт узатди, жаноб Литченстайн изоҳ берди:

— Бу ухлаб кетиладиган Пульман вагонига чипта. Шунингдек, бугунги сана билан ёзилган барча пулларинг жамланган чек.

Тун бўйи поездда ухлолмай, тўлғониб чиқдим. Мен энди кимман? Пастга қараб кетаётган ёш йигитча...

Мен «Чатануга» жамоаси бир неча кундан бери ўйнаётган Янги Орлеандаги «Сент-Чарлз» меҳмонхонасига ташриф буюргач, Олий лиганинг собиқ ўйинчиси, менежер Кид Элберфилд билан учрашдим. Унинг биринчи сўрагани шу бўлди:

— Сенга нима бўлди, Фрэнк?

— Қўлимни шикастлантириб қўйдим, — деб очик-ойдин жавоб бердим мен. — Аммо ишонаманки, яқин кунларда тўла-тўкис тузаламан.

Янги Орлеан жуда иссиқ эди. Қўлим анча тузалиб қолганини билиб, руҳим кўтарилди. Чатанугага келганимизнинг бешинчи кунида тўсатдан Кид менга деди:

— Сени президент кўрмоқчи!

— Ҳозирнинг ўзидали? — сўрадим мен.

— Ҳа, ҳозироқ, — бош иргади Элберфилд.

Менга унинг шу зайлда жавоб бергани мутлақо ёқмади.

Президентни Паттон деб аташарди. У жуда бадавлат бўлиб, боулинг-клуб, «Паттон» меҳмонхонаси ва бутун жануб бўйлаб бир неча меҳмонхона тармоқларининг эгаси эди. Мен «Паттон» меҳмонхонасидаги кабинетига кириб борганимда, мафтункор қиз шундай деди: «Жаноб Паттон мажлис ўтказяпти. У киши сиз билан учраша олмайди». Қиз менга бир конверт узатди. Унинг ичидан машина када ёзилган хатни чиқардим. Хатда қуйидаги гаплар ёзилганди:

«Сизни Миллий лиганинг Сент-Луис бейсбол клуби ва «Чатануга» бейсбол клуби сафидан қайта тикланмайдиган қилиб бўшатганимизни маълум қиласиз. Ишдан бўшатиш дарҳол кучга киради. Бугунга қадар, шу билан бирга, шартномангизга мувофик қўшимча 10 кунга маош тўлаш тўғрисида чек илова қилинади».

Бейсбол чиллаги билан бошимга туширишса, бундан кучлироқ гангитмаган бўларди. Гандираклаб, меҳмонхона вестибиюлига чиқдим. Шунчалик таъсирангандимки, қаёққа кетаётганимни билмасдим. Теннеси дарёси устидан ўтган баланд кўприқда ўзимга келдим. Ортимдан кичкина бир кўпнак эргашганди. Бирорта жонзот менга бунчалик ҳамдардлик билан қарамаганди.

Мен кўприк панжарасига суюниб, йиглаб юбордим. Ёнимда ҳеч ким йўқ эди, шунинг учун кўз ёшларимни тўкавердим. Ўзимни шунчалик эзилган, ҳар қандай кежалақдан марҳум этилгандай ҳис қиласдим. Ўз-ўзини умидсизликка гирифтор этишдан ортиқ руҳий синиш бормикан? Мен бу ерни ўз-ўзини ўлдириш учун энг яхши жой деган ўйга келдим.

Назаримда, кўпнак менинг пастга сакрамоқчи эканлигимни сезди, шекилли, орқа оёқларида тик туриб, олдингисини тиззамга қўйди. Сўнг зорлангандай, сакрама, дегандай, ангиллай бошлади. У кўзларимга тик қараб, таскин бермоқчидай кўринди.

Ўша куни эрталаб ҳеч ким мени бу жонивордай тинчлантира олмаган бўларди. Мен у билан бирга юрак-юракдан йигладим. Ит мени тушунгандай бўлди.

Биласизми, наслдор итнинг менга шу тарзда ҳамдардлик билан муносабатда бўлишига ишонмайман. Афтидан, бир пайтлар бу кўпнак итнинг думига консерва банкаларини боғлашган. Мен билан ҳам тахминан шундай қилишди. Шу боис ит ҳолатимни жуда яхши тушунди... Мен энди ҳеч кимга керак эмасдим.

Кўприқдан тушдим-у, хушсурат кичкина дўстимнинг босини меҳр билан силаб, ҳамдардлиги учун миннатдор-

чилик билдиридим. У менга бахтга тўлиқандай қаради ва тушунгандай думини ликиллатиб қўйди. Сўнг кўча бўйлаб менинг қай тарзда кетаётганимни кузатиб турди. Муюлишга бурилар эканман, орқамга ўгирилиб қарадим. Ит ҳамон изимдан тасалли бергандек тикилиб туради.

Мен ўтган кечани ўтказган ночоргина меҳмонхонага қайтиб келдим. У ерда кетчер Габби Стратни учратдим (дарвоҷе, у бир неча йил ўтиб, «Кардиналлар» менежери бўлганди). Габби мен билан қандайдир кўнгилсизлик рўй берганини дарров фаҳмлади.

– Нима гап, Бетч? – сўради у.

Мен унга ҳеч нима дея олмадим. Фақат хатни кўрсатдим, холос. Габби уни ўқиб кўриб, менга ҳайрон бўлиб қаради ва шундай деди:

– Бай-бай-бай! Менимча, сен лига учун жуда керакли ўйинчи эдинг!

Габбини ҳеч қачон унутмайман. У менга нафақат ҳамдардлик билдириди, балки мен билан телеграфга бориб, ўзининг ҳисобидан барча дўстлари, мамлакат бўйлаб жамоаларнинг менежерларига телеграммалар жўнатди. Унга фақат битта – Техас лигасидаги «Гальвестон» менежери жавоб қайтарди, холос.

Икки кундан сўнг мен Гальвестонда эдим. Жанубнинг иссиқ иклимида қўлим анчагина эпақага келиб қолган, шу боис мени учинчи базага қўйишди. Бу жойда ҳаракатланиш ўзимга ёқарди. Мен «Гальвестон» учун яхши ўйнадим: ўйлаб урилган зарбалар, масофани айланиб чиқишлилар очколар олиб келди. Аммо бир куни коптокни тез иргитар эканман – қўлим гўё узилиб тушгандай бўлди! Мен ҳаммаси тугаганини англадим.

Икки кун ўтди. Менежер олдимга келди. Юзидаги информациида қараб, унинг нима демоқчи эканлигини англадим ва биз бирданига шундай деб юбордик:

– Фрэнк, сени президент кўрмокчи!

Олдинда нима кутаётганини аллақачон билгандим. Бу ўша мавсумда мени кўрмокчи бўлган тўртинчи президент эди. Уларнинг ҳаммаси бир хил тарзда қабул қиласарди.

Энди думимга түртта лигадан түртта консерва банка боғлаб қўйилганди!

«Гальвестон» ўйинчиларидан бири шундай деди:

— Фрэнк, сен бейсбол бўйича барча даврлар учун рекорд ўрнатдинг. Ҳеч ким бунчалик пастга қуламаганди: катта лигалардан АА тоифагача, сўнг А тоифага, кейин В тоифагача – буларнинг барчаси битта мавсумда!

Мен ҳаммасини бошидан бошлашга қарор қилдим. Ўзим доимо яхши кўрган шаҳар – Шимолий Каролина штатидаги Шарлоттага телеграмма юбордим. У ерда мени фаворит спортчи деб ҳисоблашарди: ўшанда «Каролина»дан «Сент-Луис»га сотишганди. Жавоб жуда тез келди:

**«ДАРХОЛ ШАРЛОТТАГА ЕТИБ КЕЛ... БАРЧА МУХЛИСЛАР ШОД БЎЛИШАРДИ...»**

Шарлотта вокзалида мени бошқа президент – жамоанинг бош соҳиби Жорж Уэрн кутиб олди. Жаноб Уэрн дарахт кесувчи бўлган ва унинг ёнида ҳеч қандай консерва банкалари йўқ эди. Аммо у билан бирга бейсболнинг қизиқон ишқибозлари жуда кўп эди. Ўша оқшом мени машхур Тай Кобб ёки Бейб Рут каби кутиб олишди!

Мен қўлни истисно қилганда, яхши тайёргарлик кўрганимни уларга айтдим.

— Ҳечқиси йўқ, – деди менежер. – Биз сени биринчи барага қўямиз. Копток ташлашингга тўғри келмайди.

Эртаси кунги ўйинда бу мавсумдаги энг кўп томошабин ийғилганди. Мен майдонда пайдо бўлганимда, олқишлиш учун ҳамма ўрнидан турди. Ва омадим келди! Биринчи тўпни узатишгач, уни чап томондаги дублга урдим. Ишқибозлар бирдан бақириб юборишиди. Худдики мен «Шарлотта»ни чемпионликка олиб чиққандай.

Уч кун давомида тўпни рисоладагидай урдим. Тўртинчи куни биз Шимолий Каролина маркази Ролига йўл олдик. Рутубатли, булатли кун эди. Биринчи тўп иргитилгач уни ура олмадим, катта тезлиқда келаётган тўп билагимга тегди. Қўлим мутлақо бўйсунмай қолди. Энди бейсбол билан ҳаммаси узил-кесил тамом бўлган эди. Мен рекорд ўрнатгандим: бир мавсумда бейсболнинг энг тубига қадар тушиб

кетгандим – олий лигадан Д тоифага, яъни профессионал бейсболдаги энг паст тоифага.

Бир йил ичида мендан кўра кўпроқ лигаларда ўйнаган ва жой алмаштирган ягона инсон Жорж Вашингтон эди. Уни бутун халқ бир оғиздан «Миллат отаси» деб атарди.

Лекин мен бешта президентни кўриш баҳтига мұяссар бўлган кишиман!

### Олтинчи бўлим «ҚИПИҚЛИ СЎҚМОҚ»

Мен Шарлоттадан жўнаб кетганимдан сўнг кўпчилик қўлимни ҳеч қандай йўл билан тузатиб бўлмайди, деб ҳисобларди. Жамоа, агар келгуси йили келсам, уларнинг менежери бўлишимни таклиф қилди. Мен аро йўлда иккиланиб қолдим ва ўйлаб олиш учун вақт беришларини сўрадим.

Филадельфияга, уйимга қайтганимда, қўшни қиз ўзининг мафтункор табассуми билан кутиб олди. Шунчалик чиройли бўлиб кетибдики, зўрга танидим. У мен учун ҳамиша «қўшни қиз» бўлиб қолганди, энди эса ўсиб-улғайибди! Бироз вақт ўтгач, мен бу қизга ўйландим.

Бутун қалбим билан севган бейсболни тарк этишим мен учун энг оғир азму қарор эди. Азоб ичида қолиб, иккиландим, аммо фарзандли бўлишимизни билганимдан сўнг қатъий қарорга келдим: Миллер Хаггинснинг маслаҳатига амал қиласман. Бейсболни ташлашим, ёш эканман, ниманидир ўрганишим керак.

Мен яна чилангар-сантехникнинг ёрдамчиси бўлиб, ҳафтасига саккиз доллар учун ишлай олмасдим. Велосипедда юриб, кредиттга ишлайдиган мебель концернининг йигирма беш, эллик центлик тўловини йигиши билан машғул бўлдим. Шунингдек, ҳар бир мавсум учун уч ойда яна уч юз долларлик фаолият йўналиши – Суартмор коллежидаги бейсбол жамоаси тренерлигига ярим ставка иш топишга ҳам муваффақ бўлдим. Мен худди телбалардай велосипед тепкисини айлантирадим. Чунки ўз вақтида тўловларни

йигиб олишим ва тушдан кейинги соат 14.30 да Филадельфиядан ўн беш мил нарида жойлашган Суартморга жүнайдыган поездга улгуришим керак эди.

Деярли уч йил давомида велосипедда юриб, зўрға тирикчилик ўтказдим. Мен яна нимани ўргана олардим? Яна қаерга ишга жойлашишим мумкин? Аммо тўсатдан ҳаётим тубдан ўзгариб кетди.

Ҳаммаси илгари олий лигада ўйнаган машҳур профессионал-бейсболчи Билл Сандейнинг Филадельфияга Инжилчилар жамоаси билан бирга келишидан бошланди. Мен ибодатхонага қатнамасдим, аммо газеталарнинг бош мақолала-ридан «қипиқли сўқмоқ»قا аъзо бўлаётган минглаб кишилар тўғрисида ўқигандим. Бутун шаҳар безовталаниб қолган эди.

Бир оқшом таникли воизнинг Биллга шундай дегани ҳақида ўқиб қолдим:

– Жаноб Сандей, сизни кўп танқид қилишади. Кўпчиликнинг айтишича, мурожаатларингиз узоқ яшамайди.

– Майда чақалар ҳам кўпга бормайди! – деб жавоб берди Билл кулимсираб.

*Бу менга жуда ёқди. Балки менга ҳам айнан майда чақалар етиши маётгандир,* деб ўйладим!

Эртаси куни барвақт турдим-у, велосипедни миниб, автобекатда маҳсус Билли Сандей машварати учун ёғочдан ясалган катта ибодатхонага келдим. Аммо мен ичкарига кирмоқчи бўлганимда, полиция тўхтатди. Барча жойлар банд бўлганини айтишди (ўн беш мингта ўриндиқ-а!).

Ибодатхонада турган хизматчининг мени қандай ҳайдаб юбораётганларига кўзи тушди. Афтидан, у юзимдаги умид-сизликни кўрган, шекилли, дарров ташқарига чиқди. Эҳтимол, шимимдаги қисқичлар дикқатини ўзига тортгандир. Мен велосипедимни жойлаштирибман-у, уларни олишни унуглан эканман.

– Офицер, – деди хизматчи, менинг тирсагимдан ушлар экан, – бизда бу йигит учун жой бор.

У мени улуғвор табассум билан ўртадаги ўтиш жойи томон бошлади. Бутун пол қипиқ билан тўлиб кетганди. Мен ҳозиргача уларни оёғим остида ҳис этаман.

Ҳақиқатан ҳам битта бўш жой топилди! Мени ўтқазишган заҳоти Билли Сандей маърузасини бошлади. Унинг гапларини деярли сўзма-сўз такрорлашим мумкин:

– Бундан бир неча йил муқаддам, кунларнинг бирида, Чикаго кўчаларида «Вайт сокс» жамоаси ўйинчилари билан бирга кетаётгандим. Якшанба, пешин маҳали эди. Биз майхонага кириб, ичкилибозлик қилдик. Чикқанимиздан сўнг панжарага тизилишиб ўтиридик. Йўлнинг шундок нариги томонидаги бурчакда мўъжаз оркестр садо таратар, унда эркаклар ҳам, аёллар ҳам бўлиб, мадҳиялар куйлашарди. Одатда, онам ҳам шундай қўшиқларни хиргойи қиларди. Мен қадрдон Айовамни эсладим-у, хўрсиниб йиглай бошладим. Кутилмаганда олдимга бир ўсмир келди-да, шундай деди: «Биз боқقا кетяпмиз, бирга боришни хоҳламайсанми? Ишончим комил, бу сенга ёқади. Ароқхўрлар қандай қилиб ичишни ташлагани, қизлар эса ёмон одатлардан қандай халос бўлганини эшитасан». Мен ўрнимдан туриб, ўртоқларимга дедим: «Энди бас қилдим. Мени ғолиблар жамоасига қабул қилишмоқда!» Ва улардан юз ўғирдим. Дўстларимдан қай бири хаҳолаб кулди, бошқалари масхара қила бошлашиди, аммо биттаси мени қўллаб-кувватлади.

Билли Сандей мароқли ҳикоясини давом эттириди. У ойига минг доллар маош оладиган бейсболчилик фаолиятидан воз кечиб, ёш насронийлар уюшмасида атиги 80 долларга ишлашга ўтганини сўзлаб берди. Гапираётган пайтида кўксига муштлади, костюми ва бўйинбоғини ечиб полга улоқтириди. У стулга иргиб чиқди, уй майдончасида ҳаракат қилаётган бейсболчи каби полга узала тушиб ётиб олди!

Нихоят Билли минбарда тирсагига таяниб туриб, одамларни яқинроқ келиб, қўлидан ушлашга чақирди. Мен «қипиқли сўқмоқ»га қадам қўйган биринчи киши бўлдим!

Биллининг юзидан тер оқар, шунчалик жиққа хўл эдики, уни ҳозиргина «Вайт сокс» базасидан елиб келган деб ўйлаш мумкин эди. Биллининг қўлини ушлаганимда, у кулимсираб шундай деди:

– Худо сени Ўз паноҳида асрасин, ўғлим. Ҳаётингнинг ҳар бир соатида дуо қиласман.

Мен ўша куни уйга қайтадан туғилгандек бўлиб қайтдим. Ҳаётим қачон ва қай тарзда ўзгаришини тасаввур қила олмас, аммо велосипедда кезиш онларим яқин кунларда ниҳоясига етишига ишонардим. Энди мен ғолиблар жамоасида эдим!

Бу воқеадан кўп ўтмай Суартмордаги ўйинлардан бирида спорт қўмитаси раиси Чарлз Хож минбардан пастга тушиб келди-да, ўйинчилар ўриндиғида мен билан ёнма-ён ўтирди. У бироз вақт тренернинг жамоани имо-ишора билан қандай бошқариб турганини кузатди. Кейин шундай деди:

– Фрэнк, сен нима иш билан машғулсан?

Мен тўловларни йиғишириш билан шуғулланаётганимни айтдим.

– Бир иложини топиб, олдимга кир, – деди у. – Сен билан гаплашиб олмоқчиман.

Жаноб Хож филиаллари бутун мамлакат бўйлаб тарқалган Филадельфиянинг ҳаётни суғурталовчи «Fidelity Mutual» ширкатида котиб бўлиб ишлар экан.

У билан кўришиш учун эртасигаёқ шошиб йўлга тушдим. Хож менга бир нечта саволлар бериб, тугмачани босди ва котибасидан Карл Коллингсни чақиришни сўради. Жаноб Коллингс уларнинг Филадельфиядаги менежери эди.

Орадан икки ҳафта ўтгач, душанба куни эрталаб мен уйдан ўзимнинг кўчада киядиган костюмим билан чикдим. Велосипедсиз. Мен ҳаётни суғурталовчи кишига айлангандим!

### Еттинчи бўлим

## МЕН СУҒУРТА ДУНЁСИНИ ҲАЙРАТГА СОЛАМАН

Суғурта агенти бўлганимдан сўнг, кўп ўтмай, суғурта дунёсини ҳайратга солдим. Мен ишлаётган компания инсон шу қадар кўплаб ташрифларига қарамай қандай қилиб ҳеч нима сота олмаганига тушунмасди!

Узоқ ва умидсизликда ўтган ўн ойдан сўнг, жаноб Коллингс бунинг жавобини топганини айтди. У ўз фикрини

тагдор қилиб шундай ифодалади: мен нұноқ савдо агенти эканман. Хуллас, чиқим ҳисобимни ёпишди. Бу «учинчи страйл» эди ва мени ишдан бүшатиши.

Тахминан ўша пайтда эски касалим ўзини билдириб қўйди. Компаниямизда суғурталовчи бўлиб ишловчи нафақахўр Гарри Прутцман исмли киши (дунёдаги энг хушмуомала инсонлардан бири) кўринишими касал одамга ўхшашини айтди. Унга бор гапни баён қилдим. Прутцман дарҳол ўзининг эски дўсти, машхур жарроҳ Жон Дивер билан гаплашиб, мени текширувдан ўтказишини сўради. Доктор Дивер зудлик билан операция қилиш кераклигини айтди. Мени Ланко госпиталига ётқизиши. Тўлов ҳақини ҳам кейинчалик беришга келишилди.

Операциядан сўнг менинг жисмим доимий равища қақшаб оғрир, аммо руҳий азоб ундан ҳам баттар эди. Бейсболдаги ўша охирги қайғули кунлар эсимга тушар, ўзимни эндинигина топган пайтимда жароҳатланган қўлим мени бутунлай сафдан чиқариб ташлаганди.

«Нега? Нега?» – бу савонни қайта-қайта такрорлардим. Мана, ёшгина йигит, собиқ ҳамхонам Миллер Хаггинс энди Нью-Йоркдаги «Янки» номли жамоанинг менежери бўлган ва бойиб кетган!.. Мен эса йигирма тўқиз ёшли руҳан синган ёш бейсболчиман. Ишсизман, кундан-кунга қарзга ботиб бормоқдаман – нима иш билан машғул бўлмайин, тўла-тўқис омадсизман.

Менинг ғолиблар жамоасида бўлишимга доир ишончим эндилиқда бутунлай барҳам топганди.

Бундан буён тўшакда қола олмасдим. Тўртинчи куни ўрнимдан турдим. Палатадаги бошқа беморлар кўриб қолмасин, деб парда орқасига ўтиб кийиндим. Сўнг йўлак бўйлаб ўгринча юриб кетдим. Ҳамширалар иш билан шунчалик банд эдиларки, менинг учта зина пиллапоясини босиб, одамларга тўлган шифохонадан чиқиб кетганимни сезмай қолиши. Йўлда таксида борар эканман, оғриқдан азият чекардим. Уйга келсам, ҳеч ким йўқ. Мен каравотгача зўрга гандираклаб етиб бордим.

Шунга қарамай, орадан бир неча кун ўтгач, кўчадаги

эълонларга кўра, иш ахтаришга тушдим. Аммо ҳаммаси бефойда эди. Велосипедда кўп юришга соғлиғим имкон бермас, аммо иложсиз вазият мени олдинги фаолиятим, тўловлар йигиш ишига қайтишга мажбур этарди. Ҳайрон қолдиргани шу бўлдики, ҳатто ўша ерда ҳам менга рад жавобини бердилар!

Ўша куни тушликдан сўнг Суартморга йўл олдим. У ерга ўн кундан бери бормагандим. Ёмғир ёғаётганди. Жамоа сардори Жек Рифферт шундай деди:

– Тренер, балки сен уларни бугун ёмғирдан панага, бирорта том остига олиб ўтарсан ёки бирор нарса дерсан?

Мен уларнинг ҳар бири билан чиллақдан фойдаланиш, майдонда ўзини қай тарзда тутиш, база бўйлаб қандай югуриш зарурлиги ва бошқалар тўғрисида алоҳида гаплашдим. Аммо барчаси билан умумий тарзда сұхбатлашмадим.

Кейин катта хонага ҳаммамиз кирдик. Бир неча дақиқадан сўнг гап бошлар эканман, мени қандайдир кўркув исканжага олди. Натижада сўзимни давом эттира олмай қолдим. Хонадан қочиб чиқиб кетдим. Изимдан дарҳол сардор чиқди.

– Сизга нима бўлди, тренер? – деб сўради у шивирлаб.

Ростини айтдим:

– Мен кўрқяпман. Кўпчилик олдида гапиролмайман. Да-вом эттиришга курбим етмайди.

Жек ўша заҳоти хонага қайтди. Мен кутиб ўтирмасдан уйга қараб кетдим. «Ҳаммаси тамом, – деб ўйладим. – Жек бор гапни Док Палмерга айтиб беради».

Эртаси куни яна Суартморга отландим. Мени ишдан ҳайдашди, деб кутдим. Жекни кўриб, ундан сўрадим:

– Жек, хонага қайтиб кирганингдан сўнг болаларга нима дединг?

– Мен сени бироз мазаси бўлмади, дедим, – жавоб берди у жилмайиб.

Жекни қучоқлаб олгим келди. Ундан шу даражада миннатдор бўлгандим. Бироқ мен билан янги фалокат рўй берди. Сарғайиб кетдим. Бундай сарғайган афту башара билан кимдандир иш сўраш ҳақида ўйлаб ҳам бўлмасди.

шини күтдим. Аммо бу одам бутунлай бошқача саволлар бера бошлади... У биринчи йил учун олдиндан тұлов чекини ёзганида, мен қувонганимдан сал бўлмаса қичқириб юбораёздим.

Шунчалик ҳаяжонланғандымки, Келлининг мебель концерни ёнидан ўтиб, зудлик билан суғурта компанияси идораси томон отилдим. Жаноб Коллингснинг столи устига ариза ва чекни кўйдим. Битим бўйича ушбу воситачилик ҳаққи ўттиз кунлик ажратилган авансимни бутунлай қопларди.

— Буни қандай эпладингиз? — ҳайратга тушди у.

Эшигларидан лол қолган жаноб Коллингс шундай деди:

— Бу битим тўғрисида душанба куни эрталиб агентларимиз билан ўтказиладиган йиғилишда гапириб беришингизни истардим.

Ўша оқшом мен ўзимни ҳақиқий ғолиб қаҳрамондай ҳис этдим. Барча кўркувим ҳавога учеб кетди. Мен уни енгдим. Мен янги Фрэнк Беттжерга айландим, негалигини ҳам яхши билардим!

Мен учун энг унуглилар чиқишлиаримдан бири, орадан бир неча кун ўтгач, нотиқлик санъати гуруҳида рўй берди. Мен ўз маърузамда суғурта компаниясига қайтиб, яна бир имконият беришларини сўраганим, ташриф буюрган биринчи мижозим билан битим тузганим, бу борада бейсболдаги ғайрат-шижоатимни қўллаганим ҳақида гапириб бердим.

Ҳаётимдаги энг катта ғалабалардан бирини қўлга киритганим, бор-йўғи бир неча кун аввал бутунлай омадсиз, ишсиз бўлганим, умидсизлик гирдобига тушганим боис ҳатто иш сўрай олмаганимни бир-бир баён қилдим. Назаримда, жаноб Карнеги ва барча тингловчилар ҳам худди мендек ҳаяжонланган ҳамда баҳтиёр эди.

Машғулотдан сўнг, гурухнинг бир аъзоси, кўчмас мулк бўйича муваффақият қозонган тижоратчи Хорас Гроскин мени ҳайратга солиб, ёнимга келди ва «тўрт дақиқалилар»да нотиқ сифатида ўзи билан бирга ишлашни таклиф этди. Гап шундаки, Қўшма штатлар биринчи жаҳон уруши-

га тортилганди. Ҳукумат нотиқлар ташкилотини тузган ва «тўрт дақиқалилар» деб атаганди. Улар митинглар, саноат корхоналари, черковлар, театрлар ва ҳоказо муассасалардаги одамларга ҳукуматнинг муҳим хабарларини етказиш учун юбориларди. Шунингдек, ҳарбий облигация ҳам сотиларди. Жаноб Гроскиннинг айтишича, уларда нотиқлар етишмас экан.

– Жаноб Гроскин, мен ҳаётимда мана шу хонадан бошқа бирор жойда сўзга чиқмаганман, – дедим унга.

– Мен ҳам, – жавоб берди жаноб Гроскин, – аммо бир нечта нотиқларни эшишиб кўрдим. Улар сиздан кўра ёмон маъруза қилишди. Келинг, бир уриниб кўрайлик. Бу жуда ажойиб амалиёт бўларди.

Мен ванна ойнасига учга тўрт дюйм ҳажмдаги варак ёпишириб, унда ёзилган жумлани ҳар кун эрталаб бир неча марта такрорлардим:

### Қўрқувни енгишнинг энг яхши усули

*Нимадан энг кўп қўрқсанг, ўшани бажар. Муваффакиятга эришмагунча бажаришни давом эттиравер.*

Назаримда, бу усулни амалиётда татбиқ этиб, душманни тор-мор қилишда ҳам ўз ҳиссасини қўшиш мумкин.

Эртаси куни эрталаб Хорас Гроскин билан бирга «тўрт дақиқаликлар»нинг штаб-қароргоҳига кириб бордик ва шартларимизни баён қилдик.

Дастлаб мени яқин атрофдаги мўъжаз кинотеатрларга жўнатишиди. Биринчи оқшомнинг ўзидаёқ орқага қайтариб юборишади деб ўйлагандим. Кейин негадир Филадельфия ғарбидаги анча катта кинотеатрга юбордилар. Йўлда кетаётиб, троллейбусда таникли нотиқ ва шоир профессор Жон Деннис Махони учраб қолди. Унинг ёш насронийлар уюшмасида сўзга чиққанини кўргандим. Махонига ўзимни таништирдим ва маслаҳат сўрадим. Гап шундаки, кинотеатрлар доимо чиқишимни сеанслар ўртасига тайинлар, бу пайтда айрим томошабинлар кирса, бошқалари чиқиб кетар; шовқин-сурон шунчалик баланд бўлардики, сўзларимни ҳеч ким эшитмасди.

Мен профессордан бунга қарши қандай курашиш кераклигини сўрадим.

– УЛАРНИ ГИШТ БИЛАН АЙЛАНТИРИБ СОЛИНГ! – дея эсни оғдирадиган маслаҳат берди у.

– Сиз нимани назарда тутяпсиз? – сўрадим мен.

– Ҳайратга соладиган бирорта гап айтинг.

Сўнг шундай мисол келтириди:

– Бир куни жазирама якшанба кунида машҳур ваъзхон, руҳоний Генри Уард Бичер ўзининг ибодатхонасига олд томондаги асосий эшиқдан кирди. Марказий ўтиш жойидан оҳиста ўтиб бораркан, юзи ва бўйини катта дастрўмол билан артарди. Минбарга етгач, тўпланганларга ўгирилиб, пешанасини артди-да, шундай деди: «Ўлгудай иссиқ кун бўлди-да, тўғрими?» Бир неча сония тўхтаб олиб сўзини давом эттириди: «Ибодатхонага кираётганимда, бир киши менга шундай деди».

Қавм жазирама иссиқни батамом унутиб, унинг ваъзини алоҳида диққат-эътибор билан тинглади.

Кинотеатрга келгач, мен ҳануз «гишт билан қандай солиш» кераклигини билмасдим. Тўғридан-тўғри саҳнага элтадиган зинапояга ўтириб олдим. Фильм тугаган заҳоти югуриб саҳнага чиқдим-да, бошим узра муштимни кўтариб, қичқириб юбордим:

– Жин урсин кайзерни!

Бу ажойиб таъсир қилди! Ҳамма қоқкан қозиқдай қотиб қолди. Мен эса сўзимни давом эттирудим:

– Кинотеатрга кираётганимда, бир киши худди шундай деди... Сиз бунинг учун нима қилдингиз?

Мен тўрт дақиқа давомида тўлиқ сукунат оғушида гапирдим. Улар менга қулоқ солиб тинглашди!

Энди ўзимга ишончим янада ортди. Эртаси куни «Техасо» компанияси менежерининг ҳузурига ташриф буюрдим. Унинг манзилини бир неча ой муқаддам шу компанияда ходим бўлиб ишловчи дўстларимдан бири берганди.

– Мен юборганимни унга айта кўрма, – деб огоҳлантириди дўстим, – акс ҳолда мени ишдан ҳайдаб юборади.

Котиба мени менежернинг хонасига бошлаб борди. Ўзимни таништирганимда, у бирдан портлаб кетди:

– Мен бугун суғурта агентларини қабул қилмайман! Асабларим бузилгани боис, икки ой ишга чиқа олмадим. Кеча кечқурун хотиним менга: «Кел, анови бурчакдаги кинога борайлик, бу сени тинчлантиради», – деганди. Хўп, деб у билан бирга кинога бордим. Эндиғина жойимга ўтиргандим, қандайдир ақлдан озган телба саҳнага югуриб чиқди-ю, бор овози билан: «Жин урсин кайзерни!» – деб бақирди. Ўлиб қолсам керак, деб ўйладим.

Мен кулмасликка ҳаракат қилдим, аммо унга қараб барибир «ҳа-ҳа» деб турдим-у, сўнг хаҳолаб юбордим.

– Бунинг нимаси кулгили? – тутақиб кетди менежер.

Кулгимни зўрға босиб, ўша одам мен эканлигимни тан олдим. Рўпарамдаги киши ғазабдан кўкариб, жойидан сакраб турди. Менга эшикни кўрсатиб, бақирди:

– Кўзимдан даф бўлинг ва ҳеч қачон бу ерга қадам босманг!

Мен айнан шундай қилдим.

Бир неча кундан сўнг «тўрт дақиқалилар» штаб-қароргоҳида менга унча катта бўлмаган заводга бориб, тушлик танаффусида ишчилар билан сұхбат ўtkазиш вазифасини топширишди. Тўсатдан Вашингтондан кўнғироқ қилиб, ҳарбий кенгаш маъмури Чарлз Шваб долзарб йигилиш туфайли ушланиб қолгани ва «Budd Manufakturing» компаниясининг 16 минг кишилик ходимлари ҳузурида сўзга чиқа олмаслиги маълум қилинганди. Ўша пайтда Чарлз Шваб АҚШда президентдан кейинги машҳур киши эди.

– Ё Худо, энди нима қиламиз? – деди кимдир.

– Бошқа кишини топинг. Майли, Швабнинг ўрнига сизнинг энг яхши нотигингиз чиқсан, – деб жавоб берди бошқаси.

– Аммо бизнинг вақтимиз йўқ. Жуда кеч бўлди. Ишчилар тўпланишяпти. Улар айнан Швабнинг нутқини эшлишишмоқчи.

Бир неча лаҳзадан сўнг мен Броуд-стрит бўйлаб қизил, яп-янги очиқ кадиллақда кетиб борардим. Унга байроқча-

лар осиб ташланган, сиреналар қичқирап, мотоциклъ минганды полиция соқчилари отряди мени олд ва орқа томондан кузатиб борарди. Биз билан шаҳар ҳокимиятининг бир неча вакиллари бор эди. Аммо улардан бирортаси ҳам менинг кимлигимни сўрашга ботина олмади. Соатига 60 мил тезликда кетаётган машинамизни ўтказиб юбориш учун йўл ҳаракатини тўхтатиши.

Биз Бад заводига ташриф буюрганимизда, безатилган минбарда ярадор фахрий сўзларди. У яқинда Франциядан қайтган, қўлидан жудо бўлган, боши ҳамон бинт билан боғланганди. Фахрий кўнгилларни зириллатадиган, «ўша ер»да йигитларимиз бошидан ўтказаётган воқеа-ҳодисалар ҳақида гапираварди.

Шундан кейин «Budd» компанияси вице-президенти Лео Хейнтц мени таништириди. У, жаноб Шваб Вашингтонда ушланиб қолди, ўрнига «тўрт дақиқали»лардан бири жаноб Беттжер сўзга чиқади, деб изоҳ берди.

Оломон ҳафсаласи пир бўлиб, ўзини зўрға тийиб турарди.

Мен сўзимни тугатганимда шундай кайфиятда эдимки, гўё мени тўққизинчи иннингда аутга чиқариб, тўла базадан маҳрум қилишганди. Минбардан тушганимда ва тингловчилар иш жойига тарқала бошлаган пайтда бир киши олдимга келиб, қўлимни қисди. Бу инсоннинг кимлигини мутлақо тополмайсиз. Бу ўша «ичак» Маккарти, яъни «Мақданиэль» салуни учун ўйнаган, биз «Донахью»ни ютган кунимиздаги ўйинчи эди.

– Ҳаммаси жуда ажойиб бўлди, Бетч, – деди у хушмуомалалик билан.

– Ичак, нима, сен Бадда ишлайсанми? – сўрадим мен.

– Ҳа-да, уруш менгача ҳам етиб келди, – жавоб берди у аччиқ кулимсираб.

Бу одамни фақат жаҳон уруши ишлашга мажбур этганди!

Мен чиқиб, ўзим миниб келган байроқча осилган чиройли қизил кадиллакни ахтарсам, аллақачон кетиб қолибди. Шаҳарга қайтариб элтиш учун кутиб туриш уларнинг хаёлларига ҳам келмабди.

Муюлишга қадар пиёда юриб, троллейбусга ўтиридим. Йўл бўйлаб ўйлаб кетдим: «Мени базалар тўла бўлганида аутга чиқарип юборишганидан ажабланмаслик керак. Бу бир пайтлар Миллер Хаггинснинг ўрнида ўйнаб, Кристи Матьюсон оширган тўпни уролмаганимдан кўра беўхшов иш бўлди. Мана мен, ҳафтасига 35 доллар сарфлайдиган буюртма тўпловчи эпсиз вакил. Мени кутилмаганда захиралар ўриндиғидан суғуриб олиб «Bethlehem Steel» корпорацияси президенти, дунёда маоши йилига бир миллион доллардан ортиқ бўлган ягона инсон – Чарльз Шваб учун тўп тепишга мажбур қилишди. Кулгили кўринмай, нима бўлсин!»

Мен қаламни чиқардим ва хомчўт қила бошладим. Ҳа-а, Швабнинг уч соатлик маоши бутун бошли йиллик сарф-харжатимдан ҳам кўп экан.

«Қўрқувни енгишининг энг яхши усули... – дея ёдга олдим севимли иборамни ва давом этдим: – Мен учун қўрқув устидан ғалаба қозониш ва ўзингга нисбатан ишончни мустаҳкамлашнинг энг самарали усули шундай бўлмоғи керак: нимадан энг кўп қўрқсанг, ўшани бажар. Муваффақиятга эришмагунча бажаришни давом этти-равер».

Агар мен мазкур усул ҳақида билмаганимда ва «тўрт дақиқали» ишга ёзилиб уни татбиқ этишига ўзимни мажбур қилмаганимда, омма олдида сўзлаш туфайли юзага келган ҳаётимдаги энг кучли туйгулардан бирини бошдан кечирмаган бўлардим.

«Ёмонлик қилманг, ана шунда ҳеч нимадан қўрқмасангиз ҳам бўлади».

**Б.Франклин**

## ТҮҚҚИЗИНЧИ БҮЛİM СМАТС ҲИКОЯСИ

Чарлз Швабнинг ўрнига қовушмаган чиқиш қилганимдан сўнг «тўрт дақиқали» нотиқ бўлишимга туртки берган Хорас Гроскинни учратиб қолдим. У қисқа фурсат ичидаги ажойиб нотиқлардан бири бўлиб етишган эди. Мен машҳур миллионер Швабнинг ўрнига сўзга чиққанимдан кейинги «аут»имни айтиб берганимда Гроскин ичаги узилгунча кулди.

Хорас Гроскин кейинги чиқишиларимга дарҳол таъсир қилидиган фикр берди. Унинг айтишича, Филадельфиянинг бошқа «тўрт дақиқали»ларидан кўра кўп миқдорда ҳарбий облигациялар сотишдаги муваффақиятининг ҳақиқий сири турли-туман воқеаларни ҳикоя қилиб беришига бориб тақалар экан. Фақат мазкур ҳикоялар ҳаётдан олинган реал воқелик, «окоп ҳақиқатлари»<sup>22</sup> ҳамда шунга ўхшашиб воқеалардан иборат бўлиши лозим эмиш.

Шундай воқеалардан бирини эртаси куни унча катта бўлмаган завод ишчиларига тушки дам олишда айтиб бердим. Йигирма олти ишчи тўғридан-тўғри дастгоҳларга чиқиб ўтиришганди. Гап бошлашдан аввал бўр билан дастгоҳлар олдидаги полга қалин чизиқ чиздим-у, унинг яқинига ўриндиқ қўйиб, устига чиқдим ва шундай дедим:

— Йигитлар, мен ҳаммаси бўлиб тўрт дақиқа сўзлайман, холос. Сизларга бир воқени айтиб бермоқчиман...

Ўша пайтда, яъни касаба уюшмаларини деворга қисиб қўйишганида, жанубий Уэльс шахтёrlари иш ташлашди. Натижа нима бўлди? Ҳарбий-денгиз флоти ва қурол-яроғ, ўқ-дори ишлаб чиқарувчи заводлар учун кўмир тақчиллиги юзага келди. Иш ташлаш ҳаммани караҳт қилиб ташлади. Захирадаги кўмир фақат ўн кунга етарди, холос!

Буюк Британиянинг қаҳрамон саркардаларидан бири Жанубий африкалик генерал Ян Кристиан Сматсни шахтёрлар хузурида сўзга чиқиши учун зудлик билан чақирдилар. Мен ўша маърузани ҳеч қачон унутмайман. У сўзма-сўз шундай жаранглайди:

<sup>22</sup> Окоп ҳақиқатлари – аскар ёдномалари.

— Мен Кардиффга эртаси куни тонгда етиб бордим. Дархол шахтага қараб отландым. Кардиффдан тортиб конга қадар йўл бўйида иш ташловчилар тизилиб туришарди. Нихоят мен Тонипандига, иш ташлаш ҳаракати марказига етиб келдим. Минглаб дарғазаб одамлардан иборат улкан оломон тўпланди. «Жентльменлар, — дедим уларга, — сизга яхши маълумки, мен узоқ йўл босиб келдим. Ғалабага ҳиссамни қўшиш учун ташриф буюрдим ва сизлар билан умумий кулфатимиз тўғрисида гаплашмоқчиман. Аммо ўз мамлакатимда валлетликларни дунёда энг машҳур қўшиқчилар деб эшитгандим. Шу боис, аввало, халқингизнинг энг яхши қўшиқларидан бирини менга куйлаб берсангиз, дегандим».

Одамларнинг улкан тўдаси орасидан кимдир дархол «Оталар замини»ни куйлаб юборди. Барча иштирокчилар қўшиқ сўзларини битта қолмай илиб олиб, тик туриб куйладилар. Ана шунда вазият бутунлай юмшаганини фаҳмладим. Мен шундай дедим: «Хўш, жентльменлар, сизларнинг ҳузурингизда узоқ сўзлаб ўтиришимга ҳожат бормикан? Фарбий фронтда нималар рўй бергани сизга маълум. Хабарингиз бор, ўн минглаб ўртоқларингиз жонини гаровга қўйиб курашмоқда. Биласиз, фронт фақат Францияда ўтагётгани йўқ, фронт чизиги мана шу ердан ҳам ўтган».

Мен бор-йўғи шуни гапирдим, бунга эса бир неча дақиқа кетди, холос. Сўнг навбатдаги бошқа йиғилишга ҳам бордим ва айнан ана шуларни тақрорладим. Кеч тунда поезд билан Лондонга қайтдим. Кабинет аъзолари мени хитоб ишни бошлаб юборишиди?»

Мен: «Наҳотки? Бу мен учун янгилик», — дедим.

Ҳикояни тугатиб, мен Хорас Гроскиннинг кўрсатмаларига аниқ амал қилдим:

— Хўш, йигитлар, биласиз, фронт фақат ўша ерда эмас, шу билан бирга мана бу ердан ҳам ўтмоқда. Сизлардан ким чизикни босиб ўтиб, ҳарбий облигацияяга ёзилишни истайди?

Бир ишчи дастгоҳ устидан югуриб тушди ва мен чизиб қўйган чизиқдан ўтди. Қолган йигирма беш нафари унинг ортидан эргашди.

Мен бу ҳикоядан фойдаланишни токи уни бутунлай ёдлаб олгунча давом эттирдим. У ҳамиша мўъжизавий натижада берарди.

Уруш тугаганидан сўнг икки йил мобайнида «изқувар» бўлиб ишладим. Американинг сотув бўйича энг буюк агентларидан бири – Клейтон Хансикер учун фаровон ҳаёт кечи-рувчи мижозларни ахтариб топиш билан машғул бўлдим. Сал ўтмай, унинг муваффақият сирини билиб олдим. Хансикер одамларни ўзининг ҳикояларига моҳирона қизиқтира олгани учун ҳам облигацияларни сотарди.

– Сотиш, бу – кўп ҳолларда воқеаларни келиштириб сўзлаш маҳоратидир, – дейди у. – Сиз «маҳсулот»ингиз ҳақида ҳикоя қила туриб, ғояларингизни ҳаётга татбиқ этасиз.

– Мени узоқ вақтдан бери иш билан банд одамларнинг хузурингизга келиши ажаблантиради, – дедим унга. – Улар худди ўз ишларини бутунлай унутгандай бўлиб ўтиришади ва диққат билан тинглашади.

– Бунинг сири шундаки, – изоҳ берди жаноб Хансикер, – мен ҳамиша ҳикоямни уларнинг вазияти ёки муаммоси билан боғлайман. Шу боис, ечимини билиб олиш учун яхшилаб эшишишади.

Шу тарзда ҳикоя қилиш маърузалар ўқиш ва китоб ёзишимда менга жуда катта ёрдам берди. Суҳбатдошни ўзи тўғрисида гапириб беришга рағбатлантириш катта аҳамиятга эга эканини ҳам пайқадим. Бунда, одатда, усталик билан берилган бир ёки иккита савол етарли бўлади. Масалан: «Сиз гилам ишлаб чиқаришни қандай бошлагандингиз, жаноб Дуэр?»

Инсонга ҳамиша эътибор билан муносабатда бўлиш хуш келади. Ишончим комилки, унга сизни эшишишдан кўра, ўзи ҳақида гапириб бериши ҳамиша маъқул, шуни афзал билади. Сиз эса ўз навбатида бу одам ҳақида анча-мунча қизиқарли маълумот тўплайсиз – баъзи ҳолларда ундан сўраш нокулай бўлган тафсилотларни ҳам билиб оласиз.

Мен одамларни диққат билан тинглаб, кўплаб жозибали, илҳом бағишлийдиган, романтик воқеалари ҳақида билиб олдим. Шу билан бирга улардан ўрганадиган кўплаб жиҳатларни ҳам топаман.

Мын иштәүл дөң күннүн Гүрнәйе азырынан күргескән түштүк  
жарылышты баштап күннүн күннүн күннүн күннүн күннүн күннүн күннүн

ДАСЫННЫҢ АДАСЫН НАСЫНАСЫЛА, АЛ  
ЖАСАЛЫПТАРЫНДА ОДАСЫНДА БИЛДІРІЛДІКІНДЕ БІРДІКІНДЕ БІРДІКІНДЕ

ДАСЫННЫҢ АДАСЫН НАСЫНАСЫЛА, АЛ  
ЖАСАЛЫПТАРЫНДА ОДАСЫНДА БИЛДІРІЛДІКІНДЕ БІРДІКІНДЕ

## Иккинчи қисм

### ИШ ТАРТИБИМНИ ҚАЙ ТАРЗДА ҚАЙТА ТАШКИЛ ЭТГАНИМ ХУСУСИДА

Менинг бутун ҳәётимни  
үзгартыриб юборган  
дунёга машхур олимлар  
томонидан кашф  
этилган МУҲИМ ФОЯ

## Ўнинчи бўлим

## ФРАНКЛИН МУВАФФАҚИЯТИНИНГ СИРИ

Бир куни оқшом пайти машғулотда Дейл Карнеги боши узра китобни кўтарди-да, уни ҳар биримиз бир неча марта ўқиб чиқишимизни исташини билдириди. Бу «Бенжамин Франклиннинг таржимаи ҳоли» эди. Жаноб Карнеги уни энг ажойиб ва руҳлантирувчи китоблардан бири деб атади.

Франклин қашшоқ ўсмир бўлган. У ўн ёшидан бошлаб ишлаган. Мактабда бор-йўғи икки йил ўқиган. Филадельфияда кичик босмахона ишчиси бўлиб ишлаб, қулогигача қарзга ботган Франклин ўзини омадлироқ ишбилармонга айлантиради деб ўйлаган ғояни кашф этди. Ҳақиқатан ҳам мазкур ғоя унинг бадавлат инсон бўлишига ёрдам берди ҳамда дунёдаги энг донишманд кишилардан бирига айлантириб шуҳратини оламга ёйди.

Мени ушбу ғоянинг оддийлиги ҳайратга солди. Уни ҳар бир киши бемалол қўллаши мумкин!

Франклин ўн уч тамойилга асосланган режа ишлаб чиқди. Ҳар бирига уларнинг мазмунини тўла-тўқис қамраб олувчи қисқача дастурни илова қилди. Франклин доимо ўзи билан бирга олиб юрадиган мўъжаз ён дафтари саҳифасида ажратилган ҳар бир тамойил тагига ўзининг ғалабаси ва мағлубиятларини ёзиб борди. У барча тамойилларни бирданига амалга оширишга уринмади, балки ҳар бирига кетма-кет битта ҳафтани бағишлишга қарор қилди. Тамойиллар, маълумки, ўн учта, йилда эса эллик икки ҳафта бўлиб, шу тариқа ҳар бир тамойилни йилига тўрт марта амалиётга татбиқ этишга умид боғлади. Бутун ҳафтани битта тамойилга бағишилаган Франклин тезда ўзининг куч-кувватини битта нуқтага жамлашни ўрганди. Нимаики бўлмасин, унинг туб моҳиятини англаб етадиган бўлди.

Ярим аср ўтгач, ажойиботларга тўла умри ниҳояланяётган Франклин факат ўзининг ғояси туфайли муваффакиятга эришганини эътироф этди. «Умид қиламанки, авлодлар мендан ўrnак олади ва ундан фойда кўради», – деганди у.

Мен илгари ҳеч қачон «Таржимаи ҳол» түғрисида эшитмагандим ва Бенжамин Франклин борасида деярли ҳеч нима билмасдим. У ҳақида фақат, варрак учиради, деб юрар эканман. Ёш насронийлар уюшмаси мазкур китобларни биз учун ниҳоятда арzon нархда сотиб олди. Улардан бирини мен ҳам харид қилдим. Бор-йўғи бир доллар турарди.

Жаноб Карнеги сўзлаётган вақтида калламга аҳмоқона ғоя келиб қолди. Бу фақат собиқ бейсболчининг калласида пайдо бўлиши мумкин, чунки мен бейсбол билан Франклиннинг режаси ўртасига ёндош чизиқ ўтказгандим. Собиқ ҳамхонам Миллер Хаггинсни Нью-Йоркнинг «Янки»-сига менежер этиб тайинлашларидан олдин мазкур жамоа муваффакиятсиз ўйнарди. Хаггинснинг биринчи иши ўйинчиларнинг майдондаги жойлашув ўрнини алмаштириб, ҳар бир позицияга Бейб Рут, Лу Гериг, Боб Мезель, Уэйт Хойт ва бошқа машҳурларни жойлаштиришдан иборат бўлди. Кучларни янгитдан жойлаштириш «Янки»нинг мағлубиятдан ғалабага ўтишига ёрдам берди. Жамоа уч йил давомида охирги ўриндан биринчи поғонага чиқиб, Америка лигасининг чемпионига айланди!

«Бен Франклин билан ҳам айнан шу ҳол рўй берганди, – дедим ўзимга-ўзим. – Босмахона фаолиятида Беннинг иши олдинга қараб кетмади. Ва у ўзининг иш тартибини қайта куришга қарор қилди».

Бу менга худди фантастикадай кўринди.

Беннинг режасини ўн уч ҳафта мобайнида ўзимда синааб кўришга аҳд қилдим. «Кучларни жойлаштириш»ни ҳам Франклиндан ўзлаштирудим. Аммо даставвал уни фақат савдода татбиқ этдим. Мен Франклиннинг ўн учта тамойилидан фақат олтитасини танлаб олдим, еттитасини ишимга ёрдам берадиганига алмаштирудим. Зҳ5 дюймдаги 13 та карточка тайёрладим-у, ҳар бирiga йирик ҳарфлар билан битта тамойилни ёзиб қўйдим. Сўнгра аста-секин йил давомида ўзимнинг тамойилларимни кундалик ҳётга худди Франклин ўз фаолиятида амал қилгани каби мослаштирудим.

«Тартибларингни алмаштириш – «Янки» тактикасини татбиқ этиш демақдир, – үйладим мен. – Ҳар бир позицияга энг мос келадиган ўйинчиларни қўйиб чиқиш керак, ана шунда ғалабага эришиш мумкин!» Мен ғояни ўйинга айлантиредим. Бу жуда мароқли ва кишини қойил қолдирадиган машғулот эди. Гўё бейсболга қатнагандай бўлдим. Франклин каби ҳар бир тамойил учун битта ҳафтани ажратиб, уни ҳаётимга татбиқ этдим.

Кўп ўтмай менда ўзимга нисбатан кўпроқ ишонч пайдо бўлди. Энди ҳаётим мобайнода ҳар ҳафтада улкан муваффақиятга эришиб боришимни билардим.

Режа мени ниҳоятда руҳлантириб юборди. Шу боис, уни ким биландир баҳам кўрмоқчи бўлдим. Мен ҳам худди Франклин каби буни сир тутар, чунки оила аъзоларим ҳамда дўстларим томонидан кулгига қолишдан чўчирдим.

Мазкур тамойилларни фақат Миллер Хаггинс билан баҳам кўришим мумкин эди. Хаггинс ҳамма гапни тушунади, чунки у ҳам «Янки» тартибларини айнан шу тарзда ўзгартирган. Ва айнан Хаг менга бейсболдан воз кечиш ҳамда вақтни ўтказмай, бошқа бирор иш билан машғул бўлишни маслаҳат берганди.

Шундай қилиб, ўн уч ҳафтанинг биринчи даврасини туғатиб, шанба кунларидан бирида эрталаб поездга ўтиредим. Чўнтағимда ўн учта карточка солиб (уларни «чўнтақ хотираномалари» деб атардим), Миллер Хаггинс билан кўришиш учун Нью-Йоркка жўнаб кетдим.

## Ўн биринчи бўлим СИР ТУТИЛГАН ФИКР

Нью-Йоркка келганим заҳоти, ўша куннинг ўзидаёқ, собиқ хонадошим билан учрашдим. Бу менга бир олам қувонч бағишлиди.

– Хаг, мен ўз бизнесимга сенинг «Янки»да қўллаган усулларингни татбиқ этдим, – деб сухбатни бошладим мен.

– Нимани назарда тутяпсан? – қизиқди Хаг.

Мен шифохонада пулсиз ва ишсиз қандай ётганим тұрысіда айтиб бердім. Шунингдек, унинг Нью-Йоркда мемежерликка тайинланғани, «Янки»даги күчларнинг жойлашиш үрнини алмаштиргани ва қай тарзда ғолиб жамоага айланғани хусусида нималарни үйлаганимни гапириб бердім.

— Дастанаб мен учун жуда оғир кечди, ниҳоятда ҳафсалам пир бўлди, — дедим мен. — Ахир ҳаётимда ҳеч қачон бундай ҳол юз бермаганди. Аммо кейинчалик ҳаммаси ҳақида яхшилаб ўйлаб кўрганимдан сўнг сен бажарган ишлар руҳлантириди, Хаг. Ва мен ҳам «тартибни ўзгартириш»га жазм қилдим.

Хаггинса ўн учта чўнтак хотираномаларини кўрсатдим. Сўнг қисқа қилиб унинг режаси билан Франклин режаси ўртасида ёндош чизик тортганим ва бу ҳаётимга қандай таъсир қилганини айтиб бердим.

У ҳар бир карточкани тезгина кўраркан, юзидағи ифодани кузатдим. Хаггинснинг бор-йўғи иккита ажralиб турадиган жиҳати бўлиб — оғзи катта ва ақли зўр эди. У карточкаларни қайтариб бераркан, мутлақо ҳеч қандай муносабат билдирамади. Фақат ўрнидан туриб, шундай деди:

— Менинг ўйингоҳга бориш вақтим бўлди, Фрэнк. Бугун ўйин олдидан кутилмаган совға тайёрладик, у сени қизиқтирса керак. Киргин, ўйиндан сўнг кўришамиз.

Ўша пайтларда унutilmas Бейб Рут ўзининг эришиб бўлмас жаҳон рекордига яқинлашган эди. У етти юз ийигирма тўқиз марта масофани айланиб чиқиб уйни забт этганди. Жумладан, мазкур натижанинг ўн бештасини жаҳон чемпионатида кўлга киритганди. Бейб Рут туфайли «Поло граундз» стадионида янги тоифадаги ишқибоз — биринчи база қаерда жойлашганини билмайдиган, аммо бу ўйинчи ҳақида эшигтан ва уни қай тарзда уйни кўлга киритишини кўришга илҳақ ҳавасманд пайдо бўлганди. Бейб миллий қаҳрамонга айланғанди.

Рут ўйин бошланганида майдончада ўзининг тўп урадиган жойини эгаллаганди. «Янки»даги тўп узатувчилардан бири унга жуда катта тезлиқда тўпни улоқтириди. Бейб ўзи-

нинг улуғвор қўл силташи билан 50 минг ишқибозга ҳузур бағишлиб, бир нечта тўпни тўсиқдан ташқарига урди.

Бир гал тўп 441 футли белгидан ошиб ўтиб, марказий майдондан узоқча учиб кетди. Аксарият ишқибозлар Чиллаклар Қиролини ҳадеганда кўришмас, шу боис зарбасининг бутун кучини англолмай қолардилар. Энди эса Бейб уларни забт этди. Ҳатто, иккала жамоа ўйинчилари ҳам ўринларидан туриб, олқишлиб чапак чалишди!

Ана шундан сўнг Хаггинс менга шама қилган энг катта кутилмаган совғага навбат етди. Асосий база майдончасига бир чиройли қиз чиқди, уни оммага таништиришди. У англиялик Жойс Уэзеред бўлиб, аёллар ўртасида ўтказиладиган голъф бўйича Британиянинг очиқ чемпионатида яқинда ғалаба қозонганди. Жойс голъф ўйинида дунё миқёсида эътироф этилган энг яхши ўйинчи сифатида танилганди. Бу соҳибжамол хоним бўйи 6 футу 20 дюйм, оғирлиги 210 фунт бўлган Бейт Рутнинг қўлини сикқанида, унинг олдида нимжон гўдакка ўхшаб қолди.

Стадионда ҳозир бўлганлардан фақат якка-ярим одам кейинчалик рўй берадиган кишини ҳаяжонлантирувчи томошадан хабардор эди. Ҳатто Бейб ҳам билмасди.

Жойс тўп узатувчининг ўрнида турди ва энгашди. Сўнг голъф учун мўлжалланган тўпни ёғочдан ясалган уч оёқли жажжи таглик устига қўйди. Таглик ерга қоқилганди. «Янки» учун чиллакни узатувчи бола унга голъф калтагини берди. Қиз қўлларини жуфтлаб аввалига икки бор силкитди ва ниҳоят коптокни шундай баландга уриб майдоннинг ўнг четидан ошириб юбордики, барча томошабинлар ҳайратга тушишди. Сўнгра коптокни яна таглик устига қўйди-да, майдоннинг чап тўсиғи оша олис томонга йўллади. Ана шунда энг ажабтовур воқеа рўй берди. Жойс яна янги коптокни ўрнатди, майдон ўртасидаги 441-футли белги томон бурилиб, уни шу даражада баланд ва узоқча улоқтиридики, копток белгидан ҳам, ечиниш хонасининг томи устидан ҳам учиб ўтди!.. Балки ҳозир ҳам қаердадир учиб юргандир. Ишқибозлар коптокни охирги марта катта тезлик билан Гарлем дарёси устида учиб юрганига кўзла-

ри тушган. Унинг суви шу атрофдаги Атлантика океанига қүйлади...

Үйиндан сўнг мен билан яна учрашган Хаггинс сўради:

– Жойс Уэзереднинг ўша азамат тўп ташловчи Бейб Рутга тупургани сенга ёқдими?

– Мен бундай лол қолдирадиган томошани ҳали кўрмагандим, – дедим мен. – Сири нимада?

– Сири шундаки, гольф коптоклари махсус тарзда бейсболнидан икки баробар узокроқча учадиган қилиб тайёрланади. Гап унинг таркибий қисмида, – жавоб берди Хаггинс кулиб.

Шундан сўнг Миллер Хаггинс менга шундай ғояни тақдим этдики, у ҳётимни бутунлай ўзгартириб юборди. Хаггинс шундай деди:

– Фрэнк, Жонстаунда Берт Конн думингга консерва банкасини боғлагани сени бейсболнинг олий лигасига олиб чиқкан ўша таркибий қисм эди. Кейинроқ у сени суғурта бизнесига олиб келди ва савдода ишинг ўнгидан кела бошлади. Агар ана шу сеҳрли таркибий қисмни менга кўрсатган карточкалардаги ўн уч тамойилнинг ҳар бирига қўллассанг борми, у ҳолда Американинг энг буюк суғурта ходими бўласан!

Таркибий қисм ғояси менга янги қувват бахш этди. У лиликни ёқиш учун менга етишмаган учқунни тухфа қилди. Ўша консерва банкасига бир кути динамитни айнан Берт Конн қўйди. Аммо фақат Миллер Хаггинс уни *портплата* олди, холос!

Менинг ўн уч тамойилим:

1. Файрат-шижоат.
2. Тартиб (ўз-ўзини ташкил этиш).
3. Бошқаларга ғамхўрлик қилиш.
4. Саволлар.
5. Жим туриш (кўпроқ эшитиш).
6. Қатъийлик.
7. Тежамкорлик.
8. Самимийлик.
9. Танқид ўрнига мақташ.